

নারী প্রগতি

(আধুনিক সমাজ চিত্র)

রূপমহলে অভিনীত

(শুভ উদ্বোধন রজনী ১লা আগষ্ট শনিবার ১৯৩৬)

The Crown and Glory of Life is character


শ্রীহেমেন্দ্রলাল পাল চৌধুরী প্রণীত

মূল্য আট আনা

Published by—
Hemendra Lal Pal Chowdhary
13, Gossain Para Lane
P. O. Hatkhola
Calcutta

First Edition

Printed by—
Gopal Chandra Bose
at the Kohinoor Printing Works
108, Amherst Street
Calcutta



নিবেদন

আমার লিখিত “তরুণ তরুণী” আর “নারী-প্রগতি” একই জিনিস।
কোনও অনিবার্য কারণে নামের পরিবর্তন হ'ল মাত্র।

মহাকবি গিরিশচন্দ্রের চিরসহচর, সাহিত্যিক ও নাট্যকার শ্রীযুক্ত
অবিনাশচন্দ্র গঙ্গোপাধ্যায় কর্তৃক নারী-প্রগতি সংশোধিত ও
পরিবর্দ্ধিত। ইতি—

নাট্যকার

উৎসর্গ

যার পুণ্য-স্মৃতি লক্ষ্য করে' "নারী-প্রগতি" অঙ্কিত করেছি, আমার হৃদয়রাজ্যের একমাত্র রাজরাণী স্বর্গগতা সেই সতীলক্ষ্মী ৬ রাধাকুঞ্জ দাসীর উদ্দেশ্যে তা'ই উৎসর্গ করলুম ।

প্রাণপ্রিয়ে ! তোমার আবদার আমি কিছুই মেটাতে পারিনি ।
তুমি বহুদূরে—তোমার লাগাল আজও পেলুম না ! তুমি যেখানেই থাক,
একবার পড়ো, তবেই আমার গমস্ত শ্রম সার্থক হবে । ইতি কুলনযাত্রা
১৩৪৩ সন ।

তোমারই ভাগ্যহীন
স্বামী ।

চরিত্ৰ

পুৰুষ

কুবেৰ নাথ	মিস্ত্ৰান ধনী (কৃপণ)
বিদ্যাপতি (হাবু)	...	কুবেৰ নাথের পোষ্যপুত্ৰ
ধনপতি	বিদ্যাপতির স্বশুৰ (ধনী কৃপণ)
মিঃ সেন্ Mr. Shanno		
(যতীশচন্দ্ৰ সেন্)	...	দুশ্চৰিত্ৰ সুবক (বিলাত ফেরত)
শঙ্কৰা	ঐ ভৃত্তা
বেহাৰী	জনৈক ঘটক
ছোকৰা	জনৈক Compounder

সুবকগণ, বক্কুগণ, পুরোহিত, বৈরাগী, রিক্সাওয়ালা,
পাহাড়াওয়ালাঘর ইত্যাদি

স্ত্ৰী

সাবিত্ৰী	ধনপতির কন্যা (বিদ্যাপতির স্ত্ৰী)
শ্বেতাঙ্গিনী	সাবিত্ৰীর সহ
মিস্ ডোভী Miss. Dowvi		
(কাদম্বিনী দেবী)	...	দুশ্চৰিত্ৰা সুবতী
শান্তি	যতীশের প্রথম স্ত্ৰী

সুবতীগণ, ঘটকীঠাকৰুণ, খেমটাওয়ালীগণ, পিসীমা ইত্যাদি

নারী-প্রগতি

প্রথম অঙ্ক

প্রথম গর্ভাঙ্ক

কর্ণওয়ালিস্ স্ট্রীট

(মিস্ কে, ডোভীর বৈঠকখানা । সাইনবোর্ড “Diplomed
Lady Doctor Miss K. Dowvi” “Wanted
Passed Compounder.” সময়—সন্ধ্যা । শঙ্করা
টেবিল, চেয়ার, আয়না, শাট্-স্ট্যাণ্ড ইত্যাদি
পরীক্ষার করিতেছে । মিঃ সেন্ ও মিস্
ডোভী সাক্ষা-ভ্রমণ করিয়া
ফিরিতেছে)

শঙ্করা । কিমিতি মজার চাকরি ! বেহারাকু বেহারা, খানসমাকু খানসমা,
জুতা সেলাই ঠাকু চণ্ডীপাঠ পর্য্যন্ত কিছি মোর বাকী নাই । খাইন
তার দিয় সেথিব শঙ্করা । কহিবাকু লাজমাডুছি মেম্ সাইবর দিহ্ টিপি
দিঁয়ে মু সেই শঙ্করা । খালি শঙ্করা, শঙ্করা, শঙ্করা ! যিমিতি হয়াকু
চৌদ্দপুরুষ কিনা গোলাম অছি ! কঁড় করিমি, দিঠা পয়সা তো মিলুচি ।

এই নিয়, মদ আনিবাকু, সোঠা পানি আনিবাকু, বরফ আনিবাকু, বাজার হাট করিবাকু, শঙ্করা বিনা দস্তুরি ছাড়া কিছি কাম করু নাই। (কি মজার চাকরি ! বেয়ারাকে বেয়ারা, চাকরকে চাকর, বাবুরচীকে বাবুরচী, জুত সেলাই চণ্ডীপাঠ কিছুই আমার বাকী নাই ! যা'তে দাও, তা'তেই শঙ্করা ! বলতে লজ্জা করে, আবার মেম্ সাহেবার পা টিপে দিতেও আমি সেই শঙ্করা ! শঙ্করা—শঙ্করা—শঙ্করা ! শঙ্করা যেন চৌদ্দ পুরুষের কেনা গোলাম ! কি করি, ছু'ট পরসী পাই তো। এই ধর, মদ আন্তে, সোডা আন্তে, মুরগী আন্তে, বাজার হাট ক'রতেও দস্তুরী ছাড়া শঙ্করা কোন কাজই করে না !)*

(নৃত্য ও গীত)

শঙ্করারে তোর বরাত ভারি জোর ।
সাইবন্ধু ঠকিকি টঙ্কা রোজগার করিলু
মনরে দুঃখ নাহি তোর ।
অছনিকা চড়িমি রেলকু জিনি ঘরকু
দেখিমি রসবতী মুখ মোর ।
তানাগি নেমি মুগাপটা, পানবটা,
নুথ, দণ্ডিগোণা, পাটমঠা পিন্দিকি
চালিগলা খিনি ছসিব কেঁড়ে সুন্দর বঁধবে মোর ।
দেখিলা খিনি হাবড়ি পড়িমি
ভার্য্যার উপর মোর ।

পাঠকগণের বুদ্ধিবার সুবিধার নিমিত্ত ব্রাকেটে বঙ্গানুবাদ দেওয়া হইল।

(শঙ্করারে, তোর বরাত ভারি জোব ।
 [হ্যান্না হ্যান্না ধাই কিরি কিরি ধ্যান্না ।]
 যাইব কটক, চড়িব ঘোটক,
 ধাই কিরি কিরি চুম খাব রসবতীর মুখ ।
 নাকেতে রসকলি, কোমরে শিকলি,
 পাছা দেলাইয়া যায় প্রিয়সী মোর ।
 মনে হ'লে তারি কথা, পরাণে লাগে ব্যথা,
 প্রিয়সীর লাগি নিয়ে যাব পাছাপেড়ে কাপড় ।)

(সাহেব ও মেম্ বেষে যুগলে মিঃ সেন্
 ও মিস ডোভীর প্রবেশ ।)

মিঃ সেন্ । মিস্ ডোভী, তোমার জন্ম আজ Evening walk টা
 মোটেই ভাল হ'ল না । কেন বল দেখি তুমি এত তাড়াতাড়ি
 চ'লে এলে ?

মিস্ ডোভী । মিঃ সেন্, তুমি একটা আস্ত Fool ! আমার যে
 engagement রয়েছে ৭ টায় । (হাত বড়ি দেখা) ওহো no
 more ! বড্ড late হ'য়েছে ! তুমি যাও ভেতরে যাও । তোমায়
 যে ভাবে শিখিয়েছি মনে আছে ত ?

মিঃ সেন্ । বটে ! আজই কি সেই engagement নাক ?

মিস্ ডোভী । আবে Stupid ! আর তোমায় কত শেখাব ? (Diary
 book খুলিয়া) yes, to-day is our lucky engagement !
 তুমি কি রকম বিলাত-ফেরতা ? ইংরেজের এটিকেট কিছই

শিখতে পার নি ! আমি India য় থেকে যা কপি ক'রেছি, তুমি বিলেত যেয়েও তা ক'রতে পার নি । এদিন তো তুমি ভাল ক'বে নেকটাই বাধতে পারতে না । ভাগ্যিস আমি শিখিয়েছিলুম । তোমার আচার-ব্যবহার দেখে প্রথমে মনে ক'রেছিলুম, তুমি বুঝি Europe এর কোনও প্রসিদ্ধ মাঠে গোচারণ ক'রতে ! যাক্, এখন আর দেবী ক'রো না । যা যা ব'লেছি ঠিক ক'রে করো, শিকার যেন ফস্কে না যায় ।

মিঃ সেন । মিস ডোভী, তুমি যা ঠাউরেছ তা নেহাৎ মিথ্যেও নয় । আমি Woodland এর এক corner এ সত্যই তাই চরাতুম । কি করি, তুমি তো সবই শুনেছ । আমার কি আর পয়সা ছিল ! এখান থেকে তো জাহাজের খালাসি হ'য়ে গিয়েছিলুম ! যাক্ সে কথা, এস একটু চা পান করা যাক্ । Boy, চা লিয়াও ।

শঙ্করা । হুজুর মু বয় নু'হে—ম্যান অছি । ছুয়া নুহে মুওটে মরদ অছি ।

(আক্ষেপে আমি বয় নই—ম্যান ।)

মিস ডোভী । Damn, Nonsense ! জলদি চা লিয়াও ।

শঙ্করা । (স্বগত) হুকুম দব দিয়, গালি দো'ছ কা'হি কি !

(হুকুম দিবে দাও, গালি দাও কেন !)

মিঃ সেন । জলদি যাও, Stupid !

[শঙ্করার কাঁপিতে কাঁপিতে ভয়ে ভয়ে প্রস্থান ।

(শঙ্করার চা লইয়া প্রবেশ)

শঙ্করা । চা আনছি, পিও ।

(চা এনেছি. খান ।) [প্রস্থান ।

মিঃ সেন্ । (চা পান করিতে করিতে) মিস্ ডোভী—my darling,
তোমার policy দেখে আমার মনে ধিক্কার হ'চ্ছে !

মিস্ ডোভী । মূর্গ, আজ যা policy ক'রেছি, দশ হাজারের কমে ছাড়ব
না । (হাত ঘড়ি দেখিয়া) যাও শীগ্গীর যাও, তা'দের আসবার
সময় হ'য়েছে । (উভয়ের সিগারেট খাওয়া ও মিঃ সেনের প্রস্থান)

মিস্ ডোভী । (আপন মনে গান গাহিয়া) বড় লোকের ছেলে, তাতে
পোষ্যপুত্র—আবার বোকা ! দেখতে জানোয়ার তো জানোয়ার !
দেখি ঘটক ব্যাটা কি করে । ঘটককে হাতে রাখতেই হবে । খায়
থাবে ছু'পয়সা ! মিঃ সেন্ যদি গোলমাল না করে, তবে দশ
হাজারের কমে কিছুতেই মেটা'ব না । তা হ'লে আমাদের এক
বছরের খরচার নিশ্চিন্ত ।

[ভিতরে প্রস্থান ।

(বেহারী ঘটক পশ্চাতে সাহেব-বেশী বিদ্যাপতির ঘটকের
হাত ধরিয়া ভয়ে-ভয়ে সন্তর্পণে প্রবেশ)

বেহারী । চ'লে এস, ভয় কি ! এইতো সেই বাড়ী—সেই নম্বর—সেই
সাইনবোর্ড । এখন এত ভয় ক'রছ, পরে মেম্ সাহেবকে নিয়ে
ঘর ক'রবে কি ক'রে ? সাহস ক'বে বুক ফুলিয়ে সাহেবী চালে চ'লতে
শেখ, তা নইলে তোমায় সে পছন্দ ক'রবে কেন ?

বিদ্যা । তা—তা হবে ঘটক মশাই । আস্তে আস্তে ধীরে ধীরে—এক-
বারেই কি হয় । লেক রোডে (Lake Road) যখন মেম্
সাহেবের হাতে হাত দিয়ে গালে ইয়ে ক'রে—

বেহারী। চুপ্ চুপ্—ও কথা কি এখন ব'লতে আছে? তুমি কোন কথা কইবে না। কেবল সাহেবিয়ানা হাব-ভাব দেখাবে। যা ক'রতে হয়, আমিই ক'রব।

বিছা। সে কি ঘটক মশাই, যা করবার আপনি ক'রবেন, আমি কিছু ক'রব না?

বেহারী। তা ক'রবে না তো কি—নিশ্চয় ক'রবে। বেড়াবে হাত ধ'বে, খাবে এক সঙ্গে, দু'জনে kiss ক'রবে।

বিছা। সত্যই ঘটক মশাই, kiss ক'রবে! (স্বুতির হাস্য)

বেহারী। এই যে মিস্ ডোভী! মনে কিছু ক'রবেন না। আমাদের আসতে একটু লেট্ হ'য়েছে।

মিস্ ডোভী। তাইতো বলি, বাঙ্গালী সময়ের মূল্য বোঝে না!

(সিগারেট খাইতে খাইতে বাহিরে আগমন)

বিছা। (স্বগত) মেন্ সাহেব সিগারেট খায় কি গো! (প্রকাশে) হাঁ মশাই, মিস্ ডোভী কি?

বেহারী। অণায় হ'য়েছে, ক্ষমা ক'রবেন। (হাবুর প্রতি) তুমি ওসব বুঝবে না, মিস্ ডোভীকে বিয়ে ক'রে বিলেত যাও, আদব-কায়দা শেখ, তখন বুঝবে। এ যে বিলাতী এটিকেট্, বুঝলে! এখন ছোট্ট ছোট্ট বিলাতী চংএর নাম না রাখলে বর পছন্দই ক'রবে না! আবার বরের নামও এ রকম না হ'লে ক'নে পছন্দ ক'রবে না। খাঁটি বাঙ্গালী নাম ব'লতে এদের লজ্জা বোধ হয়।

বিছা। (স্বগত) কি সুন্দর—কি মিষ্টি কথা, গাল ছ'খানা ঘেন গোলাপ

ফুল ! Kiss ক'রব নাকি ? (প্রকাশে . হাঁ মশাই, কাদম্বিনী দেবী
যদি মিস্ ডোভী হয়, তবে আমায় কি ব'লে ডাকবেন ?

বেহারী । কেন, তেয়ার নাম বিদ্যাপতি, আমরা Mr. Knowledge
Husband ব'লে ডাকব ।

মিস্ ডোভী । বসুন ।

বেহারী । আজ্ঞে না, আমরা আর ব'সব না । এই বিদ্যাপতি বাবুকে
নিরে এলুম, সাক্ষাতেই আপনাদের বিবাহের কথা পাকা হ'য়ে যাক ।

মিস্ ডোভী । বেশ-বেশ, তাতো হবেই । তবে কি জানেন, আমার
একজন মাথার উপর—

বিদ্যা । (স্বগত) কই মাথার উপর তো কিছুই নাই !

বেহারী । তা বেশ আপনি তাঁকে ডেকে পাকা ক'রে নিন্ । তিনি
আপনার—

মিস্ ডোভী । আমার আপনার লোক, Guardian মাসী মা । তাঁকে
একবার জিজ্ঞাসা মাত্র ! অবশ্য আমার কাজে তিনি বাধা দিতে
পারেন না বা দেবেন না । তিনি আমারই অর্থে প্রতিপালিতা । তিনি
সেকালের লোক, চন্দ্র-সূর্যের মুখ পর্য্যন্ত দেখেন না । আপনি দেখলে
আপনারও ভক্তি হবে, দিন-রাত ভগবানের নাম করেন । এমন
সতীলক্ষ্মী আর হবে না ! আমার আঁধার ঘর আলো ক'রে র'য়েছেন !
তা হ'লে একবার ডাকি তাঁকে ?

বেহারী । নিশ্চয় ডাকবেন বই কি । এমন সতীলক্ষ্মীর দর্শনেও
মুক্তি !

বিদ্যা । ষটক মশাই, মাসী মাকে স্পর্শ করা যাবে না কি ?

মিস্ ডোভী। মাসীমা ও মাসীমা ! (উত্তর না পাইয়া) মাসীমা বড়
লাজুক, সহজে কথা কননা, কারু সামনে বেরোন না। মাসীমা—
ও মাসীমা !

মিঃ সেন। (অন্তরালে) যাই মা, যাই ।

(মিঃ সেনের গহনা, লালপাড় শাড়ী, পায়ে আলতা পরিয়া স্ত্রী-বেশে
ঘোমটা দিয়া প্রবেশ। অপরিচিত লোক দেখিয়া জিভ
কাটিয়া ঘোমটা টানিয়া দিয়া পিছন ফিরিয়া
দাঁড়ান, লজ্জাভিত্ত)

মিস্ ডোভী। দেখলেন আমার মাসীমাকে ? ইনি কিরকম সাধ্বী
সতী, পর পুরুষের মুখও দেখেন না। (কান্নার সুরে) দুঃখের বিষয়,
স্বামী-স্ত্রীতে মিল নাই, বিয়ের পর থেকে আর স্বামীর মুখ দেখেন
নাই, এই আমার মাসীমার কষ্ট ! কিন্তু মেসো বাবু মাসীমাকে
মনে মনে খুব ভালবাসেন ।

বেহারী। সে কি রকম ভালবাসা ? এই বল্লেন, স্বামী-স্ত্রীতে মিল
নাই, স্বামীর মুখ দেখেন নাই !

মিস্ ডোভী। তা বুঝি জানেন না, সতী স্ত্রীলোকের বিষয় আপনি
আমি কি বুঝ্ ব বলুন ? আমরা দেখতে পাচ্ছি তাঁর স্বামী নাই
—অথচ তাঁরা দিন-রাত স্বামী সেবা করেন, স্বামীকে খাইয়ে পরে
খান । (মাসীমার ঘোমটা ঠিক করিয়া দেওয়া)

বিদ্যা। (স্বগত) সে কিরে বাবা !

মিস্ ডোভী। কেন, আপনি বিশ্বাস করেন না ? ইনি যে স্বপ্নে সব

করেন, স্বপ্নে সব দেখেন ! আমরা পাপ চক্ষে কি তা দেখতে পাই । যাক্ (মাসীমার প্রতি) মাসীমা, তুমি এত লজ্জা ক'রলে চ'লবে না বাছা । ভদ্রলোক এসেছেন, তাঁদের সঙ্গে দু'ট কথো কও, আমার বিষের প্রস্তাব কর, মা তো তোমার হাতেই সঁপে দিয়ে স্বর্গে গেছেন । (উভয়ে গলা জড়াইয়া কান্না)

বেহারী । আহা আপনারা থামুন, চুপ্ করুন । এ সময় কান্নার সময় নয়, শুভ কাজে কি কান্দতে আছে । কান্দবেনই ত, পবে কত কান্দবেন । (মাসীমার প্রতি করপুটে) দেবী—

মিঃ সেন । (করপুটে) দেবতা !

বেহারী । ধনবান কুবের নাথের পুত্র শ্রীমান্ বিদ্যাপতির সন্তিত আপনার বোনকি শ্রীমতী কাদম্বিনী দেবীর শুভ পরিণয় হবে, দিন ধার্য্যও হ'য়েছে, এখন আপনার অনুমতি হ'লেই—

বিদ্যা । (স্বগত) মাসীমার জোর বরাত ! এমন মাসী মা আমাদের ভাগ্যে জোটে না !

বেহারী । আচ্ছা সতী লক্ষ্মী আপনি, দেবী—

মিঃ সেন । (করপুটে) দেবতা ! (মিস ডোভীর সন্তিত পরামর্শ করণ)

বেহারী : স্বামী-পুত্র রেখে যাওয়াইত সতীর লক্ষণ, ক'জন তা পারে ?

বিদ্যা । ঘটক মশাই, মেম্ সাহেবকে ছেড়ে দিয়ে এট মাসীমাকে বিষে ক'রলে হয় না ?

বেহারী । দূর মূর্খ, ইনি যে মাসী মা হন ।

বিদ্যা । আমার তো মাসীমা নয়, স্ত্রী হবেন—তাতে দোষ কি ? হুঁ। ঘটক মশাই, এরা কি জাত, ভাল জাততো, সমাজে চ'লবে তো ?

বেহারী। তোমার জাতে কি দরকার, Love marriage এ জাতের বিচার নেই। সাধক চণ্ডীঠাকুর রামী ধোপানীকে বিয়ে ক'রেছিল জান না? প্রেম অঙ্ক, যোঁদিকে নিয়ে যাবে, সেইদিকেই যাবে। পীরিত না মানে জাত বিচার! এ যে তোমাদের প্রেমের বন্ধন! জান না, এ যে সার্কজনীন বিবাহ!

মিস্ ডোভী। ঘটক মশাই, আমার মাসী মা বাজী হ'য়েছেন। আগামী রবিবার দিন ধার্য হ'য়েছে বিয়ে এইখানেই হবে, খরচ যা হয় আমিই ক'রব। কেবল আপনি বর সাজ আনবেন, জানেন তো, এটা Love marriage, আড়ম্বর শূন্য, প্রেমের বিয়ে।

বিদ্যা। (স্বগত) এরা খুঁটান নাকি! রবিবারে বিয়ে কেন?

বেহারী। বেশ বেশ—তাই হবে। দেখুন, আপনার মাসীমার গলার আওয়াজ এমন মর্দাটে কেন?

মিস্ ডোভী। তা বুঝি জানেন না, এ মেসো বাবুর জন্ম দিনরাত কেঁদে কেঁদে গলা ধ'রে গেছে। বলুন, বিরত-যাতনা আর কত সময়? সতী লক্ষ্মী।—তাই স'য়ে আছে।

বেহারী। তা কাঁদবেন বই কি, কাঁদবারই কথা, আহা স্বামী—পর তো নয়! আচ্ছা, মাসীমার চণন, বলন, গড়ন, ঢং-টাং সবই যেন মর্দাটে!

বিদ্যা। (স্বগত) গোফ দাড়ি নেই তো?

মিস্ ডোভী। ছুঃখের কথা কি বলব ঘটক মশাই, তবু তো আমি মেজে-ষসে সভাতা শিখিয়েছি। তা ছাড়া মেসোর জন্ম ভেবে ভেবে উপস-বারব্রত ক'রে ঘন ঘন তারকেশ্বরে হত্যে দিয়ে শরীর আরও এমন

হ'য়েছে। বিরহ-ব্যাধি যার শরীরে একবার ঢুকেছে, সে দিন দিন
ওজনে বাড়বেই তো! তা আপনি বুঝবেন না, পুরুষ মানুষ কিনা!
বেহারী। ঠিক কথা—আমরা কি বুঝব, মেয়ে মানুষতো নই! তবে
আমরা এখন আসি, নমস্কার।

বিদ্যা। হা মশাই, মাসীমার নাকে নোলক নাই কেন?

[নানা ভঙ্গিতে বিদ্যাপতি ও ঘটকের প্রশ্নান।

মিঃ সেন। (বোমটা খুলিয়া কোমর বাঁধিয়া) মিস্ ডোভী, হাতে হাত
দাও, হাতে হাত দাও।

[Handshake করিতে করিতে প্রশ্নান।

(হাসিতে হাসিতে শঙ্করার প্রবেশ)

শঙ্করা। আরে রাম রাম রাম! সাইব মাই কিনা সাজি থিলা। দেখিবাকু
বেঁড়ে সুন্দর হইথিলা! অঁকর মতলব খণ্ড কঁড়। বর্তমান পুরুষ
মনস সবু নিস ছর হই বড় বড় কেসা রথিকি মাই কিনা পুনি দেমা
যাউছন্তি। কিমিতি চিনিমি, মাই কিনা কি মরদ, হয়ে সবু না রমুছন্তি
না হালা। কে, এম, দাস, আরে কে, এম, দাস এর তো চটিজুতা
হালা। কিমিতি কে, এম, দাস হালা, মু কিছে বুঝ পারু নাই,
যা পারি ভাই হউ মোর কিছে আইলা হালা। আপনা ভার্যাকু
পর হাতরে দব কাই কি? শঙ্করা ছাড়িব নাই বাবা, সবু দেখিব,
সবু শুনিব, শঙ্করা হাতরে সবু, জিব কোঁয়াড়ে—দেখে রহিবারে
কঁড় করুচি। আরে ছি ছি! “মালো মা, কলা জামাই ভল লাগু
নাই”!

(হারে, রাম রাম রাম ! সাহেব মেয়ে মানুষ সাজেছিল ! দেখতে
কিন্তু বাহারই হয়েছিল । এদের মতলব কি ? আপনা স্ত্রী পরের হাতে
দেবে কেন ? এ শঙ্করা ছাড়বে না বাবা, সব দেখবে—সব শুন্বে ।
শঙ্করার হাতেই তো সব ! দেখি রবিবারে কি করে । আরে ছিঃ ছিঃ
ছিঃ ! (গান—“মাগো মা, কালো জামাই ভাল লাগে না ”)

[গাহিতে গাহিতে প্রস্থান ।

দ্বিতীয় গর্ভাঙ্ক

শিব-মন্দির

(সময়—সকাল বেলা । সাবিত্রী ও শ্বেতাস্বিনী
শিব-পূজার উপকরণ সহ প্রবেশ)

(উভয়ের গীত)

হর গঙ্গাধর দিকপতি-গতি বাঘাধর ।
রক্ত কান্তি বিভাসিত স্মর-হর পাদহর ॥
মঙ্গল-আলয় মহাদেব বিভু,
শাস্তির আগার মহেশ্বর প্রভু,
মুড় রুদ্র ব্যালমাল পরিধৃত কর্ণমূলে ধুস্তর ॥
বৃষভ-বাহন দেব বৃষাসন,
পঞ্চ বদনে ভীষণ গর্জন,
পুরুষ প্রবল কালভয়-বারণ জয় জয় সর্বেশ্বর ॥

(শিব-পূজা শেষ করিয়া প্রণামান্তে উভয়ের
মন্দির হইতে বাহির হওন)

সাবিত্রী । (শ্বেতাস্বিনীর গলা জড়াইয়া) সই, তুই বাবার কাছে কি বর
চেয়েছিস, ঠিক বলতো ?

শ্বেতা : তুই যে বর চেয়েছিস্ সই, আমিও সেই প্রার্থনা ক'রেছি ।

সাবিত্রী । আমি কি চেয়েছি—তা তুই কি ক'রে জানুলি ?

শ্বেতা । সই, আমরা সমবয়সী, একসঙ্গে এতদিন বাস ক'চ্ছি. বিশেষ

আমাদের অন্তর কি চায়, এ কথা কি তুমি আমি জানতে পারব না ?

তবে আমি তোমার সই কিসের ? তোমার ঐ মুখের ভঙ্গী, তোমার

ঐ উজ্জ্বল চাতকিনীপ্রায় নয়ন যুগলের চাউনি. তোমার অঙ্গের

প্রত্যেক ভঙ্গী বলে দিচ্ছে, তুমি কি চাও । সই, আমিও তো

তোমারই মত একজন, তোমার মত আকাঙ্ক্ষা, আশা, ভরসা নিয়ে

দিন গুণ্ছি—কবে বাবা ভোলানাথ ভুল ভেঙ্গে দিয়ে সংসারে মানুষের

মত মানুষ ক'রে দেবেন । স্বীজাতির আর কি সাধনা থাকতে পারে

স্বামীর পদসেবা ভিন্ন ? শিবতুল্য স্বামী কে না প্রার্থনা করে ?

সাবিত্রী । সাধে কি বাবা আশুতোষ তোমার মত একজন সঙ্গিনী মিলিয়ে

দিয়েছেন ! তোমার গুণ আমি এক মুখে—

শ্বেতা । (সাবিত্রীর মুখ চাপিয়া ধরিয়া) থাক—থাক, আর বক্তৃতায়

কাজ নেই । এখনই তোমার মুখে স্মৃত্যতির ত্রিধারা বইবে—বান্

ডাক্বে, সর্বস্ব ভাসিয়ে দিয়ে যাবে, হয়তো আমাকে শুদ্ধ ভাসিয়ে

নিয়ে কোথায় চলে যাবে, আর খুঁজেও পাবে না ! তোমার চোখে

বান্ ডাক্লে, আমি গরীব যে মারা যাব !

সাবিত্রী । তাই ভাবি,—তোর বিয়ে হ'লে, তুই তো কোথায় চ'লে যাবি ।

তোকে ছেড়ে কেমন ক'রে থাক্বে সই ? কেন, বিয়ে না ক'রলে কি

নয়, দিন কি যাবে না ? ভগবান সবই ক'রেছেন ভাল—

শ্বেতা । কেবল বিয়ের রীতিটাই ক'রেছেন মন্দ ! সই, ভগবানের কোনও

দোষ নাই, তিনি সূক্ষ্ম বিচার করেন। জীবের মঙ্গলের জন্ত তিনি অনেক কিছু ব্যবস্থা ক'রে রেখেছেন—তিনি যে মঙ্গলময়।

সাবিত্রী। সই, জানিনা, ভাগ্যে কি আছে। তবে প্রাণে এই বিশ্বাস আছে—শিবপূজা কখনও বৃথা হবে না।

শ্বেতা। সই, ভাগ্যের বিচার আমরা ক'রব না। আমরা আমাদের সংসারের কর্তব্য সাধন ক'রব, ফলাফল ভগবানের হাত। একটা সহজ কথা বলি শোন—মুটে মোট বয়, মজুরী করে, কিন্তু তা'দের পারিশ্রমিক একটা পাওনা নিশ্চয় ভগবান দেন। ভগবানে বিশ্বাস রাখ, কর্তব্য সাধন কর—মজুরীর ভাবনা নেই।

সাবিত্রী। সই, তোকে ছেড়ে আমি কি ক'রে থাকব—তাই ভাবছি।

শ্বেতা। দু'দিন পরে সব সয়ে যাবে সই। মাকাতার আমল থেকেই এই নিয়ম চ'লে আসছে। পর আপনার হয়, আপনার জন আবার পর হয়। পুত্র-শোকাতুবা জননীও দু'দিন পরে পুত্রশোক ভুলে যায়!

সাবিত্রী। সত্যই সই, কোন্ অজানা, অচেনা একজন কে এসে এ হৃদয় অধিকার ক'বে ব'সবে—তাকে ভালবাসতে হবে, প্রাণ দিয়ে তাঁকে সেবা ক'রতে হবে! দু'দিন পরে হয়তো আপনার জনের কথা মনেও থাকবে না।

শ্বেতা। এই ছাখনা, বাবা তোকে পরের বাড়ী পাঠাবেন না ব'লে ঘর-জামাই খুঁজছেন। তোকে ছেড়ে তিনি বাঁচবেন না। প্রাণের কতদূর আবেগপূর্ণ স্নেহ! এ স্নেহও একদিন টুটে যাবে। ষাক্, কথায় কথায় বেলা হ'য়ে গেল। চল, বাড়ী চল, বাবা হয়তো এখনই খুঁজতে আসবেন।

[উভয়ের প্রশ্রান।]

তৃতীয় গর্ভাঙ্ক

ঘটকপাড়া লেন । সাইনবোর্ডযুক্ত দরজা

“পাত্র-পাত্রীর অনুসন্ধান আফিস”

প্রোঃ—বেহারী ঘটক

(রাস্তা দিয়া লোকজন ষাতায়াত করিতেছে । ফেরিওয়ালাগণ

ডাকিতেছে—“চিঁড়ের চাক, ছোলার চাক, মুড়ির
চাক ।” ছেলেরা কিনিতেছে—খাইতেছে)

(ঘটকীসহ জনৈক লম্পট ছোকরার [butterfly
গোফযুক্ত] প্রবেশ)

ছোকরা । দোহাই ঘটকীঠাকুরগ, তোমার ছুঁটা পারে পড়ি, ঐ
মেমটাকে জুটিয়ে দাও । যদি না দাও, আমি আত্মহত্যা ক'রব—
হাবড়ার পুল থেকে গঙ্গায় ঝাঁপিয়ে প'ড়ব, নয় মনুমেণ্ট থেকে
লাফিয়ে প'ড়ব, তোমারই হাতে দড়ি প'ড়বে । দোহাই তোমার,
আমায় রক্ষা কর, আশ বাঁচাও, আর যে বিরহ-যন্ত্রণা সহ ক'রতে
পারছি না ! কেবলই ঐ মুখ মনে পড়ে, কেবল সেই গোলাপ ফুলের
মত • গায়ের রং, চঞ্চল নয়নের চাউনি, আর কাণে বাজে মধুমাখা
সেই কথা । ঘটকীঠাকুরগ, আমার যে মদনবাণে অন্তরটা ছেঁদা
ক'রে ফেলেছে ! সত্য মিথ্যা একবার বুকে হাত দিয়ে দেখ গো,
হাত দিয়ে দেখ । (ঘটকীর হাত টানিয়া নিজের বুকে স্থাপন) আমি

যে সেদিন তা'কে একটা সাহেবের সঙ্গে হাত ধ'রে বেড়াতে দেখেছি লেকের ধারে। আজকাল লেকে (Lake) প্রেমের বান্ জাকে নাকি ?

ঘটকী। ইস্, তাইতো বুকে যেন পাথর ভাঙছে, জাহাজের পাখা চ'লছে, মটর গাড়ীর ইঞ্জিন চ'লছে, উড়ো জাহাজ চ'লছে ! এখন উপায় ? চল, ডাক্তারখানায় চল, একটা ওষুধ ফুঁড়ে দাও। তা না হ'লে তুমি যে এখনি দম আটকে মারা যাবে গো !

ছোকরা। না ঘটকীঠাকুরগ ! কিছুই ক'রতে হবে না, তুমি কেবল ঐ মেমটীকে একবার জুটিয়ে দেও, সব ভাল হ'য়ে যাবে। এ রোগ, রোগ নয়—অন্তরে খালি প্রেমের ঢেউ উতলে উঠছে ! ঘটকীঠাকুরগ, একবার, একবার দেখাও তাঁকে, নইলে প্রাণে মারা যাব। হায়, হায়, আজ ক'দিন দেখিনি (সুব করিয়া) “একবার দেখা পাইনা কি প্রাণ তাকে। জল ফেলে জল আনতে যায় কলসী নিয়ে কাঁকে।” ম'রে যাব, মাইরি ম'রে যাব, তুমি আমায় বাঁচাও। আচ্ছা, ওরা ছ'জনই তো বাঙ্গালী, সাহেবিয়ান। চক্ষে চলে, কিন্তু ওদের উভয়ের সম্বন্ধ কি বুঝতে পার, বিয়ে ত নিশ্চয় হয়নি ?

ঘটকী। (স্বগত। যা হোক একটু আশ্বাস দিই। (প্রকাশ্যে) তুমি এত ভাবছ কেন বল দেখি ? শেষে পাগল হবে কি ? তোমার এমন রূপ, এমন গুণ, এমন ভোমরার মত গৌফ, মেঘ তো মেম্—মেমের গোষ্ঠী শুদ্ধ তোমার রূপে বশ হবে। চল, আমি তোমায় যোগাড় ক'রে দিচ্ছি। Miss Dowvi না হয়, কত রাজকন্ঠ, পরীকন্ঠা আছে—ভয় কি ? ও তো বিলিভী মেম্ নয়—

বান্ধালী ! ট্রামে, বাসে, রাস্তায়, বাগানে এইরূপ সম্পর্ক-বিহীন
প্রণয়ী যুগল আজকাল ঢের দেখতে পাবে ।

ছোকরা । তা হোক ঐটাই চাই—কর্ণওয়ালিস ষ্ট্রিটের সেই লেডি
ডাক্তারকেই চাই । আমার চোখে যে আর কাউকে তেমন সুন্দর
দেখছি না ছাই । এ কেমন রূপসী, যেন একেবারে বিলাতি স্বর্গের
কিন্নরি ! তা ছাড়া ধর আমায় রোজগার ক'রতে হবে না ।
মেম্ নিজেই ডাক্তার, অনেক পয়সা আছে । না হয় আমি তার
Boy হ'য়ে থাকব ।

ঘটকী । (স্বগত) তা হ'লেই তুমি তাকে পেয়েছ ! আর তোমার যে
রূপ—ময়ূর-বিহীন কার্তিক ! নামেই মাত্র লোক দেখান সাইনবোর্ড,
জীবনে বোধ হয় ডাক্তার হিসাবে কেউ কখনো ডাকেনি । (প্রকাশ্যে)
তার জন্ত ভাবনা কি, চল তোমার একটা হ্রাস্ত গ্রাস্ত ক'রে তবে
অন্ত কথা । কিন্তু আমার পাওনাটার কথা মনে আছেতো ? ভাল
কথা, তুমি Compoundery জান ?

ছোকরা । হাঁ জানি বই কি । আমার যথাসর্বস্ব দিয়েও তোমার
পাওনা শোধ ক'রব । কালীঘাটে জোড়া পাঁঠা দিয়ে মা কালীর
পূজ দোব । তবে আমি এখন চ'লুম ।

[প্রস্থান ।

ঘটকী । সর্বস্ব ব'লতে তোমার আছেই বা কি দেবেই বা কি !
ত্রিশ দিন তো পরের মোসাহেবী ক'রেই বেড়াও । ব্যাটা বামন
হয়ে চাঁদ ধ'রতে চায় ! মিস্ ডোভী তোর মত দণ্ডন চাকর রাখতে

পারে ; কত বড় বড় কাপ্তেন তার পড়তা, কত ছাণ্ডনোট তার
সিন্ধুক বোঝাই !

[প্রস্থান ।

(আধ ময়লা ছোট ধূতি পরিয়া ফতুঘা গায়ে
চাদর গলায় ধনপতির প্রবেশ)

ধনপতি । (কড়া নাড়িয়া) বেহারী ও বেহারী ঘটক, বাড়ী আছ হে,
একবার শোন ।

বেহারী । (অভ্যস্তর হইতে) আহা ছাড় ছাড় খরিদার এসেছে ।
(দরজা খুলিয়া প্রবেশ) আজে আপনি, তাকি জানি ছাই, আমার
পরম নোভাগা, আস্থন—বস্থন ।

ধনপতি । নাহে—এখন বসবার সময় নয় । বল দেখি, আমার সাবিত্রীর
বিয়ের সম্বন্ধ কি হ'ল ? আর তো ঘরে রাখা যায় না—বড় হ'য়েছে ।
গিন্নীর তাগাদায় অস্থির হ'য়ে পড়েছি । মেয়ে কিন্ত বিয়ের জন্ত
ততটা ব্যস্ত হয়নি । যত গোল ক'চ্ছে ঐ গিন্নী । তা ঘর জামাই
ঠিক, কি বলহে ? পয়সাগুলি, গয়নাগুলি, শেষে মেয়ে শুদ্ধ পরে
নিরে যাবে ? তার চেয়ে ঘরের জিনিষ ঘরেই থাকবে । কেমন,
ভাল নয় ? আমি মেয়ে শুদ্ধ জামাইকেও পুষব, তবু মেয়েকে খণ্ডর
বাড়ী পাঠাতে পারব না বাবা ।

বেহারী । আজে নিশ্চয় । কেন পরের বাড়ী পাঠাবেন ?—এত কষ্টের
পয়সা, এত আদরের মেয়ে পরকে দেবেন কেন, ঠিক কথা ! গিন্নীর
মত হ'য়েছে তো ? আর সাবিত্রী তেমন বড়ই বা কি হয়েছে,
আজকাল তো বড় মেয়েই সকলে চায় ।

ধনপতি । বেহারী, তুমি না হ'লে আমার মর্শ্বব্যথা কেউ বুঝবে না ।

গিন্নির ষোল আনা মত হ'য়েছে, এখন তুমি দেখে শুনে একটা মনের মত বর এনে দাও ।

বেহারী । তবে আর দেবী কেন । সেই ব'লেছিলুম, কুবের নাথের পুত্রের সঙ্গে আপনার সাবিত্রীর বিবাহ দিন, ঘর জামাই নিশ্চয় থাকবে । আমি আপনার সব ঠিক ক'রে দোব । ঘর বর সবই ভাল, রাজীও হ'য়েছে তারা । আপনি বলুন, আজই কুবের নাথকে ডেকে নিয়ে আসি ।

ধনপতি । বটে বটে ! তা ছেলেটী দেখতে কেমন, লেখা পড়া কি রকম, আমার সাবিত্রীকে ভাল বাসবে কিনা ? টাকা পয়সা নষ্ট ক'রবে না তো ? সবজামাই থাকবে তো ?

বেহারী । নিশ্চয় । আপনার কণ্ঠা আর আমার কণ্ঠা কি প্রভেদ আছে ? আমি কি তেমন ঘরে কাজ করি ? বিশেষ আপনি ধনী লোক, আপনার অল্পে আমি প্রতিপালিত । ঘরের বরের তুলনা নাই । কুবের নাথের বাড়ী আছে পাঁচখানা এই কলকাতার সহরে । কোম্পানীর কাগজ আছে পঞ্চাশ হাজার টাকার । ছেলেটী রূপে-গুণে সমান । রূপে তো কার্তিক ব'লেই হয় । গুণের পরিচয় আর কি দোব, গীতা চণ্ডী তার উদরস্থ ও ঠোঁটস্থ—পরম ধান্মিক ! দিন-রাত শাস্ত্র আলোচনা নিয়েই তো আছে । বড় বড় পণ্ডিত তার কাছে হার মেনে যায়, আমি নিজে দেখেছি । আর B.A , M.A পাশ করা তো আপনার দরকার নয়, পয়সা আছে, পরের চাকরী তো ক'রতে হবে না, নিজের বিষয়ই দেখবে ।

ধনপতি । ছেলেটির গৌফ আছে না কামান ?

বেহারী । আজ্ঞে সবে গৌফের রেখা দিয়েছে মাত্র ।

ধনপতি । আচ্ছা, ছেলেটি সিগারেট খায় না বিড়ি খায় ?

বেহারী । রাম রাম ! সে সেরকম ছেলেই নয় । বিশেষতঃ সে
“নেশা নিবারণী” সভার সভাপতি ।

ধনপতি । অল্প-আহারী তো ?

বেহারী । অজ্ঞে, সে ব্রাহ্মণ পণ্ডিতের মত মাসে ১৫ দিন উপবাস করে ।
আর যেদিন খায়, এক ছটাক চা'লেব ভাত দুবেলা, ঘি-দুধ তো
তার অরুচি । মাছ-মাংস তো খায় না । বিশেষ “অহিংসা পরম
ধর্ম” হ'ল তার প্রধান নীতি ।

ধনপতি । জামা-কাপড় কি রকম পরে ? সাহেব বাড়ীর জামা চাইনা
তো ?

বেহারী । আজ্ঞে না না । তবে ব'লছি কি,—সে ব্রাহ্মণ পণ্ডিতের
মত চলে, নামাবলী গায়ে দেয়, মাথায় টিকি রাখে, এত ছোট
কাপড় পরে যে সময় সময় কাছা দিতেও কুলয় না !

ধনপতি । হ্যাঁ ভাল কথা, চুল ছাঁটে কি রকম, কাবলীদের মত না
ব্যারিষ্টারদের মত ঘাড় কামায় ?

বেহারী । আজ্ঞে না না, ও সব কিছুই নাই । সময় সময় মাথা মুড়িয়ে
ফেলে । আর বেশী হয় তো ছ'মাসে একবার চুল কাটায় ।
আপনার সে বিষয় ভাবতে হবে না, বাজে খরচ মোটেই নাই !
আপনার পয়স নষ্ট করবে না, বরং দিন দিন কুবের নাথের পুত্র
কুবের খানা ধনরাশিতে ভরপুর ক'রে দেবে ।

ধনপতি । বেশ, বেশ. আমার মনের মতই হবে । তবে তুমি ঠিক
ক'রে ফেল । একদিন যেনে তোমাতে আমাতে পাকা দেখা
দেখে আশীর্বাদ ক'রে আস্ব ।

বেহারী । যে আজ্ঞে ।

গৃহাভ্যন্তর হইতে গিন্নী চীৎকার করিতেছে :—

“বলি কোন্ চুলোয় গেলে গো, চিতের আগুণ জ্বলবে না, পোড়া
পেটে দেবে কি, বেলা যে হ'ল !”

ধনপতি । এ কে বেহারী, তোমার স্ত্রী বুঝি ?

বেহারী । কি আর ব'লব, বড়ই অভাবে পড়েছি । জানেন তো, পুরুষের
হাতে পয়সা না থাকলে কি কষ্ট ! স্ত্রীর মুখ নাড়া, হাত নাড়া শেষ
পা নাড়াও খেতে হয় !

ধনপতি । আরে আমারও যে ঐ দশা ! তোমার পয়সার অভাবে
আর আমার কপাল দোষে ! ঐ রকম নাড়াচাড়া আমাকেও খেতে
হয় । কি ক'রবে বল, ভাগ্যে যা আছে তাই তো হবে ।

বেহারী । মশাই, গণ্ডাচারেক পয়সা দেবেন ? তা না হ'লে আজ হাঁড়িই
চড়বে না ।

ধনপতি । না না, আমি কি পয়সা নিরে এসেছি । পয়সা যেন গাছের
ফল, চাইলেই হ'ল !

[প্রস্থান ।

বেহারী । ছিঃ ছিঃ ভদ্রলোকের কাছে এত অপমান ! দাঁড়া, আজ
তোরাই একদিন কি আমারই একদিন ।

(কুবের নাথের প্রবেশ আধ ময়লা ছোট ধুতি পরিয়া,
কুতুরা গায়ে চাদর গলায়)

বেহারী । এই যে আস্তে আজ্ঞা হোক ।

কুবের । ওহে বেহারী—এই যে কি ব'লছিলাম, মেয়েটা দেখতে ভাল
তো ? মাথায় লম্বা চুল আছে না মেমেদের মত বাবুড়ী আছে ?

বেহারী । আজ্ঞে, আমরা ঘটক, সব রকমই হাতে রাখতে হয়, যে যেমন
চায়, তাকে তেমনই দিই । উপস্থিত আমার হাতে দু'টা মেয়ে আছে ।
দু'টাই রূপে-গুণে সমান । একটার নাম সাবিত্রী অপরটা বিলাসিনী ।
দু'টাই ঘর-জামাই চাই । পয়সা অগাধ । যে বিয়ে ক'রবে, সেই
সর্ব্ব-সর্ব্বা হবে । সাবিত্রী তো সাবিত্রী ! সাবিত্রীর রূপ-গুণের কথা
শাস্ত্রে যা আছে, তার কোনটাও এই সাবিত্রীর অভাব নাই ।

কুবের । বাঃ বাঃ বেশ মেয়ে, খাসা মেয়ে ! হ'লই বা ঘর-জামাই,
ছেলে পয়সা তো পাবে, বিষয়ের মালিক তো হবে ? মেয়ের বাপকে
তো আর আমার ছেলে বাপ ব'লবে না । গিন্ধী তো না বিইয়েই
কানাইএর মা হ'রে স্বর্গে গিয়ে ব'সে আছেন ! তার পরেরটা
বিলাসিনী কেমন—বার বিলাসিনী নয়তো ?

বেহারী । আজ্ঞে না, তবে সেটি Love marriage, Civil marriage
আরও কি বলে, তা ক'রতে রাজী আছে, যদি তেমন সাহেবী ঢংএর বর
পায় । অবশ্য বিবাহ-বিধি আট রকম আছে । বিবাহের আগেও—

কুবের । সে কি হে ? বিয়ের আগেই বিয়ে !

বেহারী । আজ্ঞে, তাতে কোন দোষ হয় না । হি'ছানীর পুরোণো ঢং

আর চ'লবে না। দেখছেন না, ছুনিয়ার সবই নয়া নয়া ঢং
চ'লছে, পুরোণোর আর আদর থাকবে না।

কুবের। পুরোণো চ'লের দর বেশী, পুরোণো ঘির দর বেশী, পুরোণো
সবই তো ভাল। তুমি কি ব'লছ, বুঝতে পারছি না।

বেহারী। আর বুঝে কাজ নাই। আপনার তো আব এই রকম
শিক্ষিতা ক'নে চ'লবে না। Love marriage ও হবে না, Court-
ship ও হবে না। তবে ক'নে কিন্তু বিদ্যেয় সরস্বতী, গানে, নাচে,
বক্তৃতায়, চাল-চলনে—

কুবের। এঁা, তুমি যে আমার অবাক ক'রে দিলে। গানে নাচে কি
হে! গৃহস্থ ঘরের বউ—নাচবে কিহে? ঠাকুরদের গান না হয়
ক'রতে পারে, তা ব'লে নাচবে? তবে আর থিয়েটার, খেমটা নাচ,
বাই নাচ, রয়েছে কেন?

বেহারী। আজে, ও সব না জানলে তা'দের বিয়েই হবে না! কলেজের
পাশ করা তো চাই-ই, নাচ-গানেও মেডেল পাওয়া চাই, খবরের
কাগজে তাদের নাম থাকা চাই, তবে তো তাদের বড় Family তে
বিয়ে হবে। আর নব্য কলার থিয়েটার বায়স্কোপের নাচ-গান
শুনেই তো দেশের এ দুর্দশা হ'ল! সং শিক্ষা দূরের কথা, কুশিক্ষাই
বেশী!

কুবের। না বাবা, এমন দৃষ্টি মেয়ে চাই না! তুমি সাবিত্রীকেই ঠিক
ক'রে ফেল। স্ত্রীলোকের শোভা চুলে পুরুষের শোভা গোঁফে, তা
থাকবে না! মেয়েদের এক পীঠ চুল থাকবে—পা অবধি বুলে পড়বে,
গোল গাল গড়ন হবে, পটল চেড়া চোখ হবে, গোলাপ-রঞ্চিত

অধর-ওষ্ঠ হবে, ললাটে সিন্দুর স্বেশোভিত হবে, হাতে নোয়া, লাল কস্তা পেড়ে শাড়ী পরবে, তবে তো হিছ'র ঘরের সতী লক্ষ্মী মানাবে । এঁ্যা তা নয়, উণ্টো বিচার ! আরে হ'ল কি ? কলির ছোঁড়া-ছুঁড়ী গুলো ক্ষেপে উঠল নাকি ? যতই কর বাবা, পৃথিবী গোল—ঘুরে ফিরে থাকে খেয়ে আবার এইখানেই আসতে হবে ! এই পুরোণো মাস্কাতার নিয়মই সকলকে মানতে হবে । ঋষিবাক্য বৃথা হবে না । ভাল কথা, দিনরাত ইজি চেয়ারে ব'সে নভেল নাটক প'ড়ে কাটাবে না তো ? চোখে চস্মা দিয়ে হাতে ব্যাগ নিয়ে ট্রামে বাসে স্বাধীন ভাবে বেড়াবে না তো ? রান্না-বার্না ক'রবে তো ? ঘর-কন্নার কাজ জানে তো ? গুরুজনদের মাণ্ড ক'রবে তো ? তাঁদের দেখে বোম্টা দেবে তো ? আমি বাবা গৃহস্থ-পোষা সেকেলের লোক, আমি এরকম লক্ষণযুক্তা বউ চাই ।

বেহারী । আজ্ঞে, এখন আর সেকাল নেই । কালের পরিবর্তন ঘটেছে, রুচি বদলে গেছে । আজকাল আবার Widow marriage অর্থাৎ বিধবা বিবাহ তো ঘরে ঘরেই হ'চ্ছে । তা ছাড়া আবার সাক্ষজনীন বিবাহ অর্থাৎ জাতি নির্বিশেষে এমন কি সম্পর্ক নির্বিশেষে ও নানা সমাজে বিবাহ চ'লছে । বেঁচে থাকলে আরও কত কি দেখবেন, তবে তো কলির সুরু ! আর পুরোণো চা'ল ভাতে বাড়ে না এখন ! তবে আপনার সাবিত্রী সাবিত্রী সমান, সতীলক্ষ্মীর কোনও অভাব হবে না । কুনের । শিং ভেঙ্গে বাছুরের দলে মিশে কাজ নেই বাবা ! ঠনুঠনের চটী, এই পিরাণ আর পাড়ার জোলাদের কাপড়ই যথেষ্ট । পরদেশীর অনু-করণ ক'রে দেশের বা সমাজের সর্বনাশ ক'রতে যাব কেন ? তা'রা কি

আমাদের অনুকরণ করে ? দেখ বেহারী, বড় ঘরের বা শিক্ষিত ঘরের মেয়েরা যা করে, তাতেই মানাতে পারে, কিন্তু গরীবের ঘোড়া রোগ কেন বাবা ! বড়র আর শিক্ষিতার সঙ্গে সঙ্গে যে আমাদের গরীবেরও চাল বেচাল হ'ল, আমরা গরীব যে মারা যাই ! না বাবা, তুমি আমার সাবিত্রীকেই ঠিক ক'রে দাও, আমি চাইনা এমন শিক্ষিতা । তাদের বাজে খরচ যোগাবে কে ? সার্কজনীন পূজাই .দখেছি, সার্কজনীন বিবাহ তো কখনও দেখিনি বাবা !

বেহারী । চলুন, চলুন, আমরা যাই, ঐ দেখুন একদল যুবক-যুবতী এদিকে আসছে ।

[উভয়ের প্রস্থান ।

(গান করিতে করিতে যুবক-যুবতীগণের প্রবেশ । নানা প্রকার সাজ-পোষাক, নানা প্রকার চুল ছাঁটা, নানা প্রকার গৌফ যুক্ত, হালফ্যাসানের নানা ঢং । কাহারও বই হাতে, কাহারও ব্যাগ হাতে, কাহারও ছড়ি হাতে, কাহারও চোখে চশমা ইত্যাদি ।)

(নৃত্য-গীত)

সকলে । আমরা শিখেছি Etiquette নিখুঁৎ European.

চাই নাকো পুরোণো চাল হিঁড়্যানী কিম্বা মুসলমান ।

যুবকগণ । Take Hat, Coat, Nectie. Pant, Boot,

যুবতীগণ । Lady's Cap, Body, Gown, Hand bag, Suit.

- সকলে । Do Smoking, Speaking, Walking,
Dancing, Singing and Swimming.
- যুবকগণ । চড় ল্যাণ্ডো জুড়ি Body guard.
- যুবতীগণ । Do Cycling, Driving Motar car.
- সকলে । Damn care old Fashion সাবিত্রী আর সত্যবান ।
- যুবকগণ । Dine-at Firpo, Peliti, Great Eastern,
Continental, Bristol, Hotel De Grand.
- যুবতীগণ । Buy From White-away Laid law & Co.
Francis, Harrison and Hathaway too.
- সকলে । Do Racing, Gambling, Carnival and Loittering.
পৃথিবী ঘুরব মোরা চ'ড়ে আকাশ যান্ ।

চতুর্থ গর্ভাঙ্ক

ধনপতির বৈঠকখানা

(সময়—সকাল বেলা, শ্বেতাজিনী গান করিতে করিতে প্রবেশ)

(গীত)

কেনরে পাষণ মন ভাবনা তারে ?

যে করে ভাবনা দূর ভাব তারে অন্তরে !

যে হয় সে হয় ভাগ্যবিপর্যয়, সদা ভাব তাঁরে হ'য়ে নিম্নল হৃদয়,

ভাগ্য ফলাফল রাখি' অন্তরে, অন্তরে তাঁরে রাখ ধ'রে ।

ব্যথার ব্যথী হ'য়ে ব্যথাহারী, তাপিত হৃদয়ে দিবে শান্তি-বারি,

ঘোর তিমির-নিশা যাবে দূরে, দিব্য জ্যোতি ফুটিবে আঁধারে ।

বিয়ে বিয়ে বিয়ে ! মেয়েমানুষ হ'য়ে জন্মেছি, বিয়ে ক'রতেই হবে । শিবের

মত বর সকলেই আকাঙ্ক্ষা করে, কিন্তু কর্মে যা আছে তাইত হবে ।

(ধনপতির প্রবেশ)

ধনপতি । তুই কি ভাব্ছিস শ্বেতা, বলত ?

শ্বেতা । আমি ভাব্ছি বাবা—আমার নাম শ্বেতাজিনী হ'ল কেন ?

আমি তো কালো ।

ধনপতি । বড়ই সমস্যায় ফেলেছিস মা । শ্বেতা, তোর গায়ের রং কালো

বটে, কিন্তু তোর গুণ যে সত্য সত্যই শ্বেতাজিনীর গায় মা । এ গুণের

নাম, রং এর নাম নয় শ্বেতা !

শ্বেতা । মিথ্যা কথা । আমার কি গুণ আছে যে মা সরস্বতীর সঙ্গে তুলনা ক'চ্ছেন ? বিশেষত যদিও কোন গুণ থাকে আমাতে, তাও আমি বিশ্বাস করিনা, সে তো পরের কথা ; গুণের পরিচয় পাওয়ার আগেই যে আমার নাম রেখেছেন শ্বেতাঙ্গিনী । এ গুণের নাম নয় বাবা, আদরের নাম । আমি বুঝেছি, আমাকে না তাড়িয়ে আর ছাড়বেন না ।

ধনপতি । পাগলি ! তোকে কি আর ছাড়তে পারি, তুই যে আমার আঁধার ঘরের মণিক ! ভাল কথা, আজ তোকে দেখতে আসবে, এখনি আসবে ।

শ্বেতা । কেন, আমার কি হ'য়েছে ! কে দেখতে আসবে বাবা ?

ধনপতি । ঠাখ্, সাবিত্রীর তো এক প্রকার বর ঠিক ক'রেছি । তোকে এখন দেখে শুনে দিতে পারলেই আমার দায়িত্ব লাঘব হয় ।

শ্বেতা । ওঃ আমার বিয়ের বর আসবে আমাকে দেখতে । বেশ তো আসুক না, দেখুক না, ভালই তো হয় । বিয়ে তো ক'রতেই হবে । সইয়ের হবে আর আমার হবে না ?

ধনপতি । তা মা, তুই বড় সর হ'য়েছিস্, লেখাপড়া শিখেছিস্, নিজেই পছন্দ ক'রে নে মা !

(জনৈক যুবক ও ঘটকের প্রবেশ)

বেহারী । ধনপতি বাবু বাড়ী আছেন কি ?

ধনপতি । এই যে বেহারী, এস এস, ব'সো ।

(শ্বেতাস্বিনী ব্যতীত সকলের উপবেশন)

এই আমার পালিতা কন্যা শ্রীমতী শ্বেতাস্বিনী, যার কথা আপনাকে
সে দিন ব'লেছিলুম। পালিতা হ'লেও জানবেন, আমার সাবিত্রীর
চেয়েও অধিক আদরের।

সুরেশ। তোমার নাম ?

শ্বেতা। শ্বেতাস্বিনী।

সুরেশ। কৈ, নামের পূর্বে শ্রী ব'ললে না ?

শ্বেতা। শ্রী কি বিশ্রী তাতো দেখতেই পাচ্ছেন।

সুরেশ। ঠিক কথা, চালাক বটে। আচ্ছা, তুমি তো কালো, তোমার
নাম শ্বেতাস্বিনী হ'ল কেন ?

শ্বেতা। নামের দায়ী আমি নই—মা বাপ।

ধনপতি। ওহে বাবাজী, এ রংয়ের নাম নয়—গুণের আদর।

বেহারী। সত্যই তো গুণের আদরই আদর। আম গাছে আম ফলে,
সব আমেরই কি আদর করে ? মাকাল ফল দেখতে সুন্দর, ভিতরে
ছাই। পলাস ফুল সৌরভবিহীন কিন্তু দেখতে সুন্দর, তেমন
মানুষেরও তাই।

সুরেশ। তুমি গান-বাজনা জান ?

শ্বেতা। জানি।

বেহারী। তা না হ'লে কি শুধুই শ্বেতাস্বিনী।

সুরেশ। নাচতে জান ?

(সিগারেট খাওয়া এবং ঘটক ও ধনপতির বিরক্তি প্রকাশ)

শ্বেতা। মাপ ক'রবেন। শুনেছি আপনি ম্যাট্রিক পাশ। পঞ্চাশ টাকা মাইনের কেরাণী। আপনার উপযুক্ত পাত্রী আমি নই। আপনি গান-বাজনা জানা নাচওয়ালী পাত্রী চাচ্ছেন, এই পঞ্চাশ টাকার কেরাণীর পাত্রী কি হওয়া উচিত, তা আপনিই বুঝে দেখুন? আমাকে বিবাহ ক'রলে আপনাকে রাখুন রাখতে হবে, আমাকে খাওয়াতে-পরাতে হবে, আমার নাচ-গানের উপযুক্ত সরঞ্জাম দিতে হবে। পঞ্চাশ টাকায় আপনি কোন্টা ক'রবেন বলুন দেখি? আপনি রাজী হ'লেও আমি এ বিবাহে রাজী নই। আমি আপনার বুদ্ধির প্রশংসা ক'রতুম, হয় তো বিবাহও ক'রতুম, যদি আপনি আমাকে ঘরকন্নার রান্নাবান্নার পরীক্ষা ক'রতেন। আপনি অশিক্ষিত অন্ততঃ আমার অনুপযুক্ত পাত্র। হ্যাঁ, আর একটা কথা ব'লে রাখি, শিখে রাখুন, আধুনিক সমাজের নিয়মে, আগে মেয়েরাই বরকে পরীক্ষা ক'রে তবে বিবাহ ক'রবে।

[প্রস্থান।]

ধনপতি। তবে অনুগ্রহ ক'রে আপনারা এখন আসতে পারেন। গান-বাজনার আড্ডায় গিয়ে নাচনাওয়ালী মেয়ে খুঁজুন। জানবেন—এটা ভদ্রলোকের বাড়ী। তুমি বাটনা বাটতে পার? আমার মেয়ে গান-বাজনা ক'রবে কখন? ছেলেপুলে হলে নেবে কে—তুমি?

[ঘটক ও বন্ধু অবাক হইয়া প্রস্থান।]

দ্বিতীয় অঙ্ক

প্রথম গর্ভাঙ্ক

কর্ণওয়ালিস্ ট্রীট—মিস্ কে, ডোভীর বৈঠকখানা

“Wanted passed Compounder”

(রাত্রি—৮টা, চাপরাশী-বেশে শঙ্করা বৈঠকখানার সাজ-গোছ করিতেছে ।

ফুলের তোড়া সাজাইতেছে, মনে মনে গুণ্ গুণ্ স্বরে গান

করিতেছে,—“মালো মা, কলা জামাই ভাল লাগু নাই !”)

(মাগো মা, কালো জামাই ভাল লাগে না !)

(শাড়ী পরিধান করিয়া মিস্ কে, ডোভীর প্রবেশ)

ডোভী । শঙ্করা !—

শঙ্করা । আজ্ঞা, কঁড় হুকুম করুচ ।

(জি হজুর, মেহেরবান্ হুকুম ।)

ডোভী । Whisky এনেছিস্ ক’ বোতল ?

শঙ্করা । (মদের বোতল গণনা করিতেছে, বোতলের আওয়াজ হইতেছে)

ডোভী । Stupid থাম্, বুঝেছি । যা যা ব’লেছি, সব ঠিক আছে তো ?

শঙ্করা । (সেলাম পূর্বক) শঙ্করার কেতে বেড়ে কোঁ কামরে ভুল দেখিছ

দিদিমনি ! শঙ্করাকু বাই থির দব সেথের লাগিব ভাল । এই নিয়,

ঝোলরে দিয় বা আশ্বিড়রে দিয় বা মাংসরে দিয় সেথেরে শঙ্করা

গোল আলু অছি !

(শঙ্করার কি কখনও ভুল দেখেছ দিদিমনি ! শঙ্করাকে ঘাতে দিবে, তাতেই লাগবে ভাল । এই ধর—ঝোলে দাও, অম্বলে দাও, শাকে দাও, মাংসে দাও—)

মিস্ ডোভী । ভারি ব্যাটা রাঁধিয়ে ! আমি কি তোকে রাঁধবার কথা ব'লছি Stupid, গাধা, উড়ে ম্যাড়া !

শঙ্করা । ফুনি সেই কথা ! এতে দিন শঙ্করা তম পাখরে অছি তুম অন্ন খাউছি তুমে আজি শঙ্করাকু ভল করি চিনি পারল্ নাই দিদিমনি এই ছঃখ । তুমর ঠাররে শঙ্করা সব বুঝছি ।

(ঐ সেই কথা ! এদিন শঙ্করা তোমার কাছে আছে, তোমার অর্নে প্রতিপালিত হ'চ্ছে, তুমি আজও শঙ্করাকে ভাল ক'রে চিন্লে না দিদিমনি, এই ছঃখ ! তোমার ইসারা শঙ্করা সব বোঝে ।)

মিস্ ডোভী । হুঁসিয়ার, আজ যদি ঠিক ক'রে কাজ ক'রতে পারিস্, মোটা বক্‌সিস্ পাবি ।

শঙ্করা । নিশ্চই, নিশ্চই । সব ঠিক করি কিরিমি । নাই কঁড় ? দরকার হেলে পুলিশ সাজিমি, ডর কঁড় ? তুম লাগি দিদিমনি মু জীবন দেই পারে ।

(নিশ্চয়, নিশ্চয়, ঠিক ক'রে ক'রুব । দরকার হ'লে পুলিশ সাজব— ভয় কি ! তোমার জন্তু দিদিমনি, প্রাণ দিতেও পারি ।)

মিস্ ডোভী । (হাতঘড়ি দেখিয়া) বাঙ্গালী অশিক্ষিত, সময়ের মূল্য কি জানবে ! হয়ত পাঁজি-পুঁথি দেখবে, তিথি-নক্ষত্র গুণবে—তবে বেক্‌বে । আমাদের বাঙ্গালীর অবনতির কারণই হ'চ্ছে ঐ পাঁজি-পুঁথি আর হুঁকে কঙ্কে ! বেরোবার মুখেও একবার ধম-ঘাড়া না ক'রে

বেকুতে পারবে না। হয়তো এই তামাক খেতে গিয়েই ট্রেন ফেল হ'য়ে যায়! এ পুরোণো বদ্‌ খেয়ালী না গেলে বাঙ্গালীর আর উন্নতি হবে না। আর ধর, এই বুড়োর দল এখন যা'রা আছে, তা'রা আর ক' দিন বাঁচবে,—এখন মানেই বা কে তা'দের? ক'নের ইচ্ছায় বর, বরের ইচ্ছায় ক'নে! জগৎকে দেখাব—আমরা পুরুষের চেয়ে কোন অংশেও কম নই। তা'দের দর্প খর্ব্ব ক'রব। (আপন মনে গান)

(ঘটক, ফুলের মালা হাতে বিদ্যাপতি ও জনৈক বন্ধুর [অমর])

(মেমের পোষাক ও গহণার বাক্স হাতে প্রবেশ)

বেহারী। এটা Love-marriage সমাজ,—আদব-কায়দা ঠিক ক'রে

চ'লতে হবে। মেম্ সাহেব যেমন ব'লবে, তেমনি ক'রতে হবে।

অমর। তার জন্ম ভাবনা কি, আমি বড় বড় গার্ডেন পার্টি, marriage

পার্টিতে join ক'রেছি। হাবুকেও আমি ঠিক ক'রে শিখিয়েছি।

দেখ হাবু, মদ দিলে মদও খাবে।

বিদ্যা। মদও খাওয়াবে নাকি?

বেহারী। খাওয়াবে বই কি। তোমার বন্ধুর হাত ধ'রে এস, ইনি

যেমন যেমন ক'রবেন, দেখে শুনে তেমনি ক'রো। আদব-কায়দা ঠিক

না হ'লে মেম্ সাহেব পছন্দই করবে না, ভালও বাসবে না।

(সকলের অগ্রসর হওয়া)

মিস্ ডোভী। (অভ্যর্থনা করিয়া) আসুন, আসুন—You are welcome

(সকলেই করপুটে নমস্কার করিয়া Handshake করিতে করিতে

চেয়ারে উপবেশন) আপনাদের আস্তে এত দেৱী হ'ল কেন ?
আমি মনে ক'রেছিলুম, আপনারা হয়তো আসবেন না, হয় তো অণ্ড
কোথাও ক'নে ঠিক হ'বেছে ; কি জানি, বড লোকের কথা তো
বিশ্বাস হয় না ।

বেহারী । আজ্ঞে না না, 'ও কথা বলবেন না' কথা দিয়েছি, কাজ
ক'রবই । তবে কি জানেন, আমরা সেকালের লোক—বিশেষতঃ
ব্রাহ্মণ পুরুত, পাজি-পু'থিটা দেখে মহেন্দ্রক্ষণে নিষ্ক্রামণ করাই
বিধি । এখনও তো আপনাদের মত আধুনিক শিক্ষা ততদর পাইনি ।
ক্রমে ক্রমে হবে । আজ্ঞে, তবে আর দেৱী কেন, শুভস্র শীঘ্র ।

(মেমের হাতে ফুলের মালা, পোাক, গহনা ইত্যাদি অর্পণ ।

মেম্ সব খুলিয়া দেখিল, এদা ফুলের মালা বিদ্যাপতির

গলায় পরাইয়া দিল । বন্ধুর ইঙ্গিত মত বিদ্যাপতিও

মেমের গলায় মালা পরাইয়া দিল ।

সকলের হাত তালি দেওয়া ।)

মিস্ ডোভী । শঙ্কবা, গ্লাস দে ।

(শঙ্কবা সকলকে মদের গ্লাস বিতরণ কবিতো লাগিল,

ঘটক ব্যতীত সকলেই পান করিল)

বিদ্যা । (অমরের প্রতি) কই, মেম্ সাহেব kiss ক'রলে না ?

অমর । চুপ্ Stupid, তাড়াতাড়ি কেন, সবুরে মেওয়া ফলে !

মিস্ ডোভী । শঙ্কবা, গ্লাস দে জলুদি ।

(শঙ্করা মদ বিতরণ করিতে লাগিল । মদ্য পান করিয়া

বিদ্যাপতি ও মিস্ ডোভী হাত ধরাধরি করিয়া

দাড়াইল । মিঃ সেন্ হাট কোট পরিয়া

ছড়ি হাতে প্রবেশ করিল)

মিঃ সেন্ । (ক্রোধভরে) মিস্ ডোভী, এ rascal কোন ছায় ? শঙ্করা,
পুলিশ বোলাও ।

(মিঃ সেন্ বিদ্যাপতির মাথায় লাঠি মারিতে উত্তত,

ঘটক দ্বারা বাধা প্রদান, বিদ্যাপতি বন্ধুর

পশ্চাতে লুকাইল)

শঙ্করা । পরাওয়াল', পরাওয়াল ! মারপিট করি খুন হালা, চঞ্চল
আসি কিরি, জখম হালা !

(পুলিশ, পুলিশ, মার পিট, খুণ জখম, জলদি পাকড়াও !)

বেহারী । হে সাহেব বাবা, আমার চৌদ্দ পুরুষের বাবা, মাপ কর বাবা,
মেরোনা বাবা, আমরা কিছুই জানিনা ।

মিঃ সেন্ । Damn, Nonsense, Old fellow ! তুমি জান না—এটা
ভদ্রলোকের বাড়ী, ভদ্রলোকের স্ত্রী, তোমরা তাঁকে নিয়ে ইয়ারকি
ক'চ্ছ, মদ খাচ্ছ ? আমি তোমাদের নামে Defamation Case ক'রব,
পুলিশে দেবো, ভদ্রলোকের স্ত্রীর ইজ্জৎ নষ্ট ক'রেছ । জানো,
তোমাদের কি দুর্দশা হবে ?

বেহারী । দোহাই আপনার, আমাদের খাট হ'য়েছে । নাকে কাণে ক্ষৎ ।
আর কখনও এমন ক'বুবনা, এ যাত্রা আমাদের ছেড়ে দিন, বাবা !

অমর । এই মেম সাহেব আমাদের ডেকে এনেছে, আমার বন্ধুকে বিবাহ
ক'রবে ।

মিস ডোভী । খবদার, মিথ্যাকথা ব'ললে তোমাদের পরিভ্রাণ নাই !
শঙ্করা, জলুদি পুলিশ বোলাও ।

শঙ্করা । পুলিশ, পুলিশ, পরাওয়ালা পরাওয়ালা !

([ছুটাছুটি করিয়া চীৎকার] ও পুলিশ, পাহারাওয়ালা বাবা !)

বেহারী । দোহাই সাহেব বাবা, কিছু অর্থদণ্ড ক'রে না হয় ছেড়ে দাও,
ঘরের ছেলেকে মানে মানে ঘরে ফিরিয়ে নিয়ে যাউ ।

মিঃ সেন্ । Twenty thousand ! এই ইজ্জতের মূল্য বিশ হাজারের
কম নয় ।

(মিঃ সেন্ ও মিস্ ডোভী পরামর্শ করিতেছে, কাণে কাণে কথা কহিতেছে)
(বিদ্যাপতির সঙ্গে বন্ধুর পরামর্শ করণ)

বেহারী । দোহাই বাবা, এক কাজ কর, দশ হাজার টাকার হ্যাণ্ডনোট
লিখে দিচ্ছে, নিয়ে নাও । ভয় নাই, বড় লোকের ছেলে, টাকা পাবে ।

মিঃ সেন্ । আমি তোমাদের জেলে পুরবো । ছেলেখেলা পেয়েছ ?

বেহারী । আমি ব্রাহ্মণ, তোমায় জোড়হাত ক'রে ক্ষমা চাচ্ছি, Hand-
note লিখে নাও বাবা, আমাদের রেহাই দাও বাবা !

মিস্ ডোভী । মিঃ সেন্, তাই লিখে নাও । বেশী কিছু নয়, বিয়ে ক'রতে
এসে ছ' পেগ মদ খেয়েছে মাত্র, তার মূল্য দশ হাজারের অধিক নয় ।
তুমি এবার ক্ষমা কর । শঙ্করা, কাগজ-কলম নিয়ে আয় ।

(শঙ্করা কাগজ-কলম দিলে হাবু হ্যাণ্ডনোট লিখিয়া সন্নি করিয়া দিল)

[মিঃ সেন্ ও মিস্ ডোভী ব্যতীত সকলের প্রস্থান]

মিস্ সেন্ । (মিস্ ডোভী হাত ধরিয়া হাসিতে হাসিতে) খুব শিকার
ক'রেছ বটে ! না, তোমার পেটে বুদ্ধি আছে, আমার অনেক কাজে
লাগবে । এস একটা পেগ খাই । শঙ্করা—

শঙ্করা । মু হজির অছি হুজুর ।

(জি, হুজুর ! হাজির হ্যায় । [মদ বিতরণ])

মিস্ ডোভী । চল, মাঠে খাই । (মদ পানান্তে উভয়ের বেড়াইতে গমন)

শঙ্করা । মেম বুদ্ধির জোর সংসার চালুচি । বিচিরা বাহবাকু আসি দশ
দশ হাজার টকা খরচ করি উড়াইয় দেলা, কিছু কাম হালানি । “মালো
মা কলো জমাই ভাল লাগু নাই” ।

(মেম বিবির বুদ্ধির জোরেই সংসার চ'লুছে । বেচারা বিয়ে ক'রতে
এসে দশ হাজার টাকা উড়িয়ে দিলে, কোন কাজই হ'ল না ! [টেবিল
স্বাক্ষর করিতে করিতে গান ধরিল—“মাগো মা কালো জামাই ভাল
লাগে না” ।)

দ্বিতীয় গর্ভাঙ্ক

কুবের নাথের বাড়ীর ঠাকুর-দাগান

(সময়—সকাল বেলা)

(কুবের নাথের হুকায় তামাক খাইতে খাইতে দটক সহ প্রবেশ)

কুবের । আমি ভাবছি, কোন রকমে আশীর্বাদটা হ'য়ে গেলে হয় ।

ছেলে তো নয়—যেন গুবরে পোকা,—ব্যাটার যত রূপ তত গুণ !

বেহারী । আবার নাম রেখেছেন—বিদ্যাপতি !

কুবের । আমি অনেক ভেবে চিন্তেই এই নাম রেখেছি । যদি নামের জোরে কেউ মেয়ে দেয় । গোব্রাত্তর ক'রে নাম পাল্টে তবে পোষা নিয়েছি । যা'র ঘরে জন্ম নিয়েছিল, তা'রা নাম দিয়েছিল—“হাবুল দাস” । এ নামে কেউ মেয়ে দেয় কি ?

বেহারী । ঠিক কথা,—নামে সকলেই মনে ক'রতো—ছেলেটা হাবা ।

কুবের । তাই কি বেটার সে বদনাম গেছে,—এখনও লোকে “হাবু, হাবু” বলে ডাকে ।

বেহারী । আর দেবী ক'রবেন না কর্তা মশাই, ছেলেকে ডাকুন, আপনার বেয়াই এখনই আসবেন ।

কুবের । একা আসবেন তো ?

বেহারী । না, দু' তিন জন আসবেন ।

কুবের । এত কেন ?

বেহারী। আপনার বেয়াই তো আসবেনই, একজন পুত্রোচিত তো চাই,
আর ষটক মশাই।

কুবের। ইঁ্যা ভাল কথা, কিছু খাওয়াতে হবে নাকি ? আমি তা পারব না,
ব'লে রাখছি।

বেহারী। সে কি কর্তাবাবু ! মিষ্টি মুখ করাতে হবে বই কি, শুভ কাজ !
কুবের। তা ছ' খানা ক'রে বাতাসার বেশী পারব না। আমার বাড়ীতে
সন্দেশ টন্দেশের ব্যবস্থা নাই, ও সব বিলিতি চিনির তৈরী। তুমি ও
সব হাঙ্গাম করোনা।

বেহারী। (স্বগত) তোমার এই যক্ষের ধন এই হাবুই শেষ ক'রবে !
(প্রকাশ্যে) তা আপনার যা ভাল হয়, ক'রবেন। আপনার বেয়াইও
কমতি যায় না !

কুবের। ইঁাহে, বেয়াইয়ের অনেক পয়সা আছে নয় ? আমার বিয়াপতি
তো পাবে ?

বেহারী। তাতে আপনার কি ?

কুবের। কেন, ছেলে পেলেই তো বাপের হবে। বাপের বিষয় যেমন ছেলে
পায়, ছেলের বিষয় বাপে পাবে না কেন ? পিতা-পুত্রে কি প্রভেদ
আছে ?

বেহারী। (স্বগত) বেটার এত পয়সা থাকতেও পয়সার লোভে ছেলে-
টাকে ঘর জামাই ক'চ্ছে ! (প্রকাশ্যে) আজ্ঞে না, প্রভেদ কি ! তবে
জন্ম দেওয়া ছেলেই অকাল কুমাণ্ড হয়, তাতে আবার পরের জন্ম
দেওয়া-ছেলে পোষ্য নেওয়া !

কুবের। আরে না না, শিক্ষার গুণে সব হয়। আমি যা শিক্ষা দিয়েছি,

বিদ্যাপতি তো বিদ্যারই পতি ! কই বাবা বিদ্যাপতি, ওবিছ আমার,
বাপ্ আমার—একবার বাইরে এস তো বাপধন !

বিদ্যা । (ঘরের ভিতর হইতে) যাই বাবা, যাই । এই ভরা তামাকটা
খেয়ে যাচ্ছি বাবা, তুমি একটু বসো ।

কুবের । ওরে আবাগীর বেটা, তামাক খাবি কিরে ? তোমার গুটির
মাথা খাও ! তুই এখন আসবি কিনা বল ?

বিদ্যা । (ঘরের ভিতর হইতে) যাই বাবা যাই ।

(পটুবস্ত্র পরিধান করিয়া গীতা হস্তে বিদ্যাপতির প্রবেশ)

কুবের । যেমন যেমন শিখিয়েছি, মনে আছে তো ? না, ভাতে দিয়ে
খেয়ে বসে আছ ?

বিদ্যা । ভাত কখন খেলুম, ভাত তো খাইনি বাবা ।

কুবের (ভেঙ্গচী কাটিয়া) ভাত তো খাইনি বাবা ! ব্যাটা যেন আটাশে
ছেলে !

বেহারী । আচ্ছা, আমিই শিখিয়ে ঠিক ক'রে নিচ্ছি ।

(বিদ্যাপতির আসন পাতিয়া উপবেশন, গীতা খুলিয়া মনে মনে পাঠ,—
নয়নদুগলে জল পড়িতে লাগিল, ভক্তিতে গদ-গদ ভাব,

কখনও ধ্যানস্থ হওয়া ইত্যাদি নানা ভাব-ভঙ্গী)

(ধনপতি ও পুরোহিতের প্রবেশ)

কুবের । নমস্কার ! আসুন আসুন, বেয়াই মশাই আসুন, বসুন—
তামাক খান । (হুকুপ্রদান)

ধন । নমস্কার ! (বসিয়া তামাক খাইতে খাইতে) বাঃ বাঃ, বেয়াই মশাইয়ের বাড়ীটা তো বেশ ! ছুঃখের বিষয়—গৃহ-শূন্য !

কুবের । তাইতো! ছেলেটাকে আপনার হাতে দিচ্ছি, বেয়া'ন ঠাকুরুণ মায়ের মত যত্ন ক'রবেন । আহা, বিদ্যাপতি আমার সে যত্ন পায়নি ! (স্বগত) এই ব্যাটারা যদি আমার ছেলেকে কিছু প্রশ্ন করে, তা হ'লেই আমি গেছি !

পুরো । গতশ্রু শোচনায় ফল কি ? যে গেছে, তাকে তো আর পাবেন না ! তবে আসুন কর্তা মশাই, ছেলেকে আশীর্বাদ করি । (অগ্রসর হইয়া) কর্তা মশাই, ছেলে আর দেখতে হবে না, বিদ্যাপতি তো বিদ্যারই পতি—সরস্বতী ! ওবে বাপরে—এ ছেলেকে কোন প্রশ্ন ক'রলে আমার মত লোক গালে চড় খাবে বই তো নয় ! গীতার যে শ্লোক প'ড়ে বাবাজী আমার ধ্যানস্থ হ'য়েছেন, ছ' নয়নের ধারা গঙ্গা-ধারার স্তায় গগুণ বয়ে পড়ছে, তার উপর আর কিছু জিজ্ঞাসা করবার আছে কি ? কর্তা মশায়, আর দেবী ক'রবেন না—শুভশ্রু শীঘ্রং ।

ধন । বেয়াই মশাই, তবে বরকে আশীর্বাদ করি ?

কুবের । নিশ্চয়, আশীর্বাদ ক'রবেন বৈ কি ।

(ধনপতি আশীর্বাদ করিল, শঙ্করানি ও উলুধ্বনি হইল ।

বিদ্যাপতি দণ্ডবৎ প্রণাম করিল)

পুরোহিত । বেঁচে থাকো বাবা, বিদ্যায় সরস্বতী সমান হও, সরস্বতী তোমার জিহ্বাগ্রে অধিষ্ঠান হউন । আহা কি ভক্তি ! থাক বাবা, ওঠ ওঠ, হয়েছে, যথেষ্ট হয়েছে । (হাত ধরিয়া বসাইল)

কুবের । বেয়াই মশাই, একটু মিষ্টি মুখ ক'রে যান ।

ধন । মিষ্টি কথার চেয়ে, মিষ্টি আদরের চেয়ে আর কিছু মিষ্টি আছে কি
বেয়াই মশাই ?

কুবের । আজ্ঞে, ভদ্রলোকের তো, তাই ! কতকগুলি সন্দেশ রসগোল্লা
খেলেই কি আর মিষ্টি মুখ হয় ? জানেন তো, গোপাল ভাঁড়ের সেই
গল্প ? বেশী কিছু নয়, দু'খানা দিশী চিনির বাতাসা আর এক গ্লাস
জল মাত্র । ওরে ভজা, জল খাবার নিয়ে আয় ।

ধন । আর আপনার কষ্ট ক'রতে হবে না. আর একদিন এসে খাব ।
আমার বাড়ীতেও তাই । গিন্নী তো ভারী স্বদেশ-ভক্ত—মোটী খদর
পরেন, দিশী নুন খান, দিশী সাবান মাখেন, চুল উঠে ঘাবার ভয়ে
সুগন্ধি তেল ব্যবহার করেন না,—ঘরেই গুড়ের নারকেল নাড়ু, মুড়কী
তৈরী করেন । বাজারের খাবার কখনও খাইনা । সন্দেশ, রসগোল্লা
তো আমার ঘরে ঢুকতেই পায়না, তা দিশী চিনিই হোক আর
বিলিতিই হোক ।

পুরো । শুভকার্য্য হ'য়ে গেলে কত আসবেন, কত খাবেন, তার আর
ভাবনা কি ! (স্বগত) উনি খাওয়াবেন বাতাসা, আর তিনি
খাওয়াবেন মুড়ি মুড়কি !

ধন । তবে এখন আসি বেয়াই মশাই ।

[নমস্কার প্রতি-নমস্কার পূর্বক ধনপতির ও পুরোহিতের প্রস্থান ।
বিদ্যা । বাবা, অনেকক্ষণ তামাক খাইনি, একবার হুকোটা দেও বাবা,
একটান টেনে নি, তা নইলে পেট ফুলে যে ম'রে যাব । (তামাক
খাইতে খাইতে) হ্যাঁ বাবা, যেমন যেমন শিথিয়েছিলে, তেমন তেমন

ঠিক হয়নি? তুমি কি বাবা আমাকে ভেমন ছেলে পেয়েছ? বিছা-বুদ্ধি আছে ঢের আমার পেটে, খালি ট্যাঙ্ক দেওয়ার ডয়ে খরচ করি না।

[বিরক্ত ভাবে কুবের নাথের বেগে প্রশ্নান।
বেহারী। হাঁরে মুখ, বাপের সামনে এমন ক'রে তামাক খায় বুদ্ধি,
তোমার লজ্জা করে না?]

বিছা। লজ্জা! বাপের সামনে তামাক খাওয়া লজ্জা! বাপ, তো
আপনার জন, তার কাছে লজ্জা কি? পরতো নয়। আর যদিই
বলেন, তা হ'লেও উনি তো আর জন্ম-দেওয়া বাপ নন।

বেহারী। অকাল কুশ্মাণ্ড! [বেহারীর প্রশ্নান।]

বিছা। এক কাণ্ড ক'রে দশ হাজার উড়িয়েছি—এক তুড়িতে! আবার
মেঘ না চাইতেই জল! ঘর-জামাই হ'লে শ্বশুর বেটারও ঘাড় ভাঙবে।
শুনেছি বেটার অগাধ পয়সা! দেখা যাক—ভাগ্য-চক্র কোন্ দিকে
যায়। যদি থাকে নসিবে—আপনা-আপনি আসিবে। তাই বাবা
ব'লতেন, তুই ব্যাটা ক্ষণ জন্মা, দিগ্বিজয়ী হবি! সাধ ক'রে কি এই
এত বড় মাদুলী গলায় ধারণ ক'রেছি! এই মাদুলীর জোরে আমি যা
খুসী তাই ক'রতে পারি, ক'রবও তাই।

[প্রশ্নান।]

তৃতীয় গর্ভাঙ্ক

শান্তির পিত্রালয়

(শান্তি চোখ মুছিতে মুছিতে পিসীমাসহ গৃহ হইতে প্রবেশ)

শান্তি : মা গো, আর সহ ক'রতে পাচ্ছি না, তুমি তোমার কাছে আশ্রয়
ডেকে নেও মা !

পি-মা : মা, আর কেঁদে কি হবে, ভাগ্য ছাড়া ত পথ নেই ।

শান্তি : পিসীমা, এমন পোড়া ভাগ্য কার হয় মা ! ছেলে বেলায় বাপ
খেয়েছি, মাও ছেড়ে চলে গেল । স্বশুর কুলেও কেউ নাই । ভাই নাই
বোন নাই, স্বামী থেকে ও নাই ! বল পিসীমা, এমন রান্ধাসী সন্তান
আব হুঁটা দেখেছ কি ?

পি-মা : মা, যখন যা'র বিপদ হয়, তখন এমনি করেই হয় । বিপদ
একা আসে না মা ।

শান্তি : আমার যে হুঁকুলের কেউ নাই মা !

পি-মা : যা'র কেউ নাই তা'র ভগবান মধুসূদনই আছেন ।

শান্তি : মধুসূদন আছেন ! পিসীমা, বলতে পার কোন অপরাধে আজ
আমি পতিহারা ?

পি-মা : অপরাধ ! অপরাধের বিচার কর্তা ভগবান । তুমি লেখাপড়া
শিখেছ, তোমায় আমি কি উপদেশ দোব মা, মনস্থির কর, ধৈর্যধর,
ভগবানে বিশ্বাস রাখ, তিনিই রক্ষা করবেন ।

শান্তি । দেবতুল্য স্বপ্নরছিলেন । ঘরের লক্ষ্মী ব'লে তিনি বরণ করে
আমায় ঘরে তুলে নিয়েছিলেন । পিতামাতা “লক্ষ্মী মা আমার” বলে
আদর করতেন । রূপেগুণে দেবতুল্য স্বামী পেয়েছিলুম, কিন্তু এমন
ভূভাগ্য, তাঁর পদসেবা ও করতে পারলুম না ! তবে আমার মত
এমন কপাল পোড়া কার পিসীমা ! আমার প্রায়শ্চিত্ত কি বলতে
পার ? আমি আত্মহত্যা করে মরব ! (কান্না)

পি-মা । হিঃ, এমন কাজও করোনা, এমন চিন্তা মনেও এনো না ।

আত্মহত্যা মহাপাপ । ভগবান মুখ দিয়েছেন, আহাৰও দিবেন ।

শান্তি । আহাৰ ! শিষাল কুকুরেও আহাৰ করে পিসীমা । যে স্ত্রীলোক
স্বামী থাকতে স্বামী সেবায় বঞ্চিতা তা'র বেঁচে থেকে কি ফল বলতে
পার ?

পি-মা । সত্যকথা । তা কি করবে বল, মানুষের ত কোন হাত নেই ।

তবে আমি বলছিলুম একবার কলকাতা যেরে জামায়ের খোঁজ করলে
হয় না ?

শান্তি । সে আশায় ছাই পড়েছে পিসীমা । তিনি বিষয় সম্পত্তি বেচে
দিয়ে বিলেতে চলে গেছেন । স্বামীর ভিটেবাড়ীরও যে আমার
অধিকার নেই । যদি তাই থাকতো আমি সেই ভিটে মাটী কামড়ে
পড়ে থাকতুম । আমার সবদিক শূন্য পিসীমা ! ওগো, আমি
কোথায় যাব, কি করব গো ! (কান্না)

পি-মা । চুপ্ কর মা, চুপ্ কর ! কেঁদে আর কি করবি বল ।

আমিও ত আর এখানে থাকতে পারব না । আর তোকেই বা
কেমন করে একা ফেলে যাই । সোমন্ত মেয়ে, পাড়াগা, তারপর

রক্ষা করবার মত কেউ নেই। হ্যাঁ, তোমার স্বপ্নরকুলে ত কেউ নেই, তবে এখানে জাত কুটুম্ব কেউ তোমায় দেখবে না কি ?

শান্তি। জাত কুটুম্ব ! পিসীমা, আমি যে এখন সকলেরই ভার বোঝা হয়েছি, এ বোঝা কে বইবে মা ? বিশেষ আমি গরিবের মেয়ে। বাবার ত কোন বিষয় নেই। আমিও অকস্মণ্য, খেটে খাবার ক্ষমতা ও নেই। এ অবস্থায় কে দেখবে মা।

পি-মা। তুইত জানিস্ তোব পিসেমশায় কলকাতায় মুদির দোকান করেছিলেন। তিনি মাঝে যেতে, আমি বৃড়মানুষ, কি করি, দোকান বেচে দিয়ে ছোট একখানা মুড়ি মুরকীর দোকান করেছি। অবসর মত ঠোঙ্গা তৈরী করি, মোজা সেলাই করি। খেয়ে পরে মাসে পাঁচ সাত টাকা বাঁচে।

শান্তি। তোমার সে বাড়ীতে আর কেউ থাকে না ?

পি-মা। থাকে। সব আমাবই মত গরিব দুঃখী খেটে খায়। কেউ ধাত্রী, কেউ মেয়ে পড়াষ, কেউ গান বাজনা শেখায় আরও কত কি করে।

শান্তি। আমি কিছু করতে পারিনা পিসীমা ?

পি-মা। কেন পারবে না মা। তারপর আমার কাজগুলি করতে পারলে আর 'ও দু'পয়সা উপায় হবে। তুমি যদি আমার সঙ্গে যাও মা, সুখে দুঃখে একরকম করে দিন কেটে যাবে। আর কলকাতায় থাকলে জামায়ের সন্ধানও নেয়ার সুবিধা হবে। তিনি কলকাতায় নিশ্চয় আসবেন, বিলেতে কতকাল থাকবেন।

শান্তি । (স্বগত) ভাগ্য পরীক্ষা ! (প্রকাশে) পিসীমা, আমি তোমার

সঙ্গেই যাব । যে ছ'খানা গহনা ছিল মায়ের চিকিৎসা করে আর
 দেনা দিয়ে শেষ করেছি । তোমার সাহায্য ভিন্ন আমার আর উপায়
 নেই পিসীমা । এই ছোট লোকের পাড়ায় এই কুড়েরবাস করে ইজ্জত
 বাঁচানও দায় । আর এখানে পোড়া পেটেইবা দোব কি ? বেঁচেত
 থাকতে হবে । সব হারাতে পারি ধর্ম হারাবনা । আর দেখব—
 কি পাপে আমি পতিহারা ! আমার পতি আমার হবে না ?

পি-মা । নিশ্চয় হবে মা । সতী লক্ষ্মী তুমি, তোমার স্বামী তেমারই হবে ।

শান্তি । চল পিসীমা, আজই আমরা কলকাতায় যাব ।

পি-মা । তবে চল মা, সব গুছিয়ে নিয়ে আজই যাই । আমিও ত
 দোকান বন্ধ রেখে অনেক দিন এসেছি ।

শান্তি । কি আছে, কি গুছব ! বাবা ত সবই বেচে আমার বিয়ে দিয়ে
 ফতুর হয়ে ছিলেন, হয়ত খাজনার দারে এই ভিটেমাটীও যাবে ।
 ভগবান, তুমিই মঙ্গল ময়, তুমিই আমার সুপথ দেখিয়ে দিও ।

[উভয়ের প্রস্থান ।

চতুর্থ গর্ভাঙ্ক

মিস্ কে, ডোভীর বৈঠকখানা

(সময়—সন্ধ্যা । শঙ্করা “মালো মা, কলা জামাই ভাল লাগু নাই”

(মাগো মা, কালো জামাই ভাল লাগে না) গুণ্ গুণ্ সুরে

গান করিতেছে, ঘরের আসবাব পত্র পরিষ্কার করিতেছে ।

বাস্ততা সহকাৰে মিঃ সেনের প্রবেশ)

মিঃ সেন্ । (ক্রোধভবে) শঙ্করা, শঙ্করা ! Stupid সাড়া দিচ্ছিস্ না কেন ?

শঙ্করা । (ভয় ভয়ে সেলাম করিয়া) এই এই, কঁড় কক্চ, কঁড় কক্চ—

সাইব বাবা, মু শঙ্কবা অছি ।

([সভয়ে] হেই, হেই, সাহেব বাবা, আমি আমি—)

মিঃ সেন্ । (ঘবেব চতুর্দিকে অনুসন্ধান) তুই ব্যাটা পাজী, সব জানিস্ ।

শঙ্কবা । মু হাজি অছি, পাজী অছি, মু সবু জানু চি ।

(হা জী—পাজী, আমি কি জানি !)

মিঃ সেন্ । শালা, তোমায়ে খুন করব । বল, মেম্ সাহেব কোপায়, কখন

গেছে, কার সঙ্গে গেছে ?

শঙ্করা । মাপ কর বাবা, মাপ কর বাবা । মু কিছি জানে না বাবা ।

মোতে মারনা বাবা ।

(হেই বাবা, দোহাই বাবা, মেরনা বাবা, আমি জানিনা বাবা ।)

মিঃ সেন্ । (ডুরার খুলিয়া পিস্তল বাহির করতঃ) শঙ্করা, চুপ করে দাঁড়া ।

মরতে পাববি ?

শঙ্করা । ইলো বাপোলো মালো, মোতে মারি পকাইলালো !

('ওরে বাবারে, মেরে ফেল্লে রে ! [ভয়ে এদিক ওদিক ছুটাছুটি])

মিঃ সেন্ । তবে বল শালা, মেম সাহেব কোথায় ?

শঙ্করা । আঙ্কা—আঙ্কা ।

(আঙ্কে, আঙ্কে ।)

মিঃ সেন্ । তবে শালা তোমার মরণ নিশ্চয় ! (শিশুল দ্বারা পেটে

চাপ দেওয়া)

শঙ্করা । জুহার বাবা, মারনা বাবা । মোতে মারিনে তনুকু কে রাধি

খোইব, কে তুমু জুতা ঝাড়ি দব ?

('দোহাঠি' বাবা, মেরনা বাবা । আমায় মা বলে তোমায় কে
রোঁধে খাওয়াবে, কে জুত ঝেড়ে দেবে)

মিঃ সেন্ । চুপ শালা, ঠিক করে বল, কোথায় কা'র সঙ্গে গেছে ?

শঙ্করা । সন্ধ বেড়ে গুটে সাইব আসি খিলা—তানাঙ্গেবে বাহারি গলা ।

(এই সন্ধ্যাবেলা একজন সাহেব এসেছিল । তার সঙ্গে বেবিরে
গেছে ।)

মিঃ সেন্ । (শঙ্করাকে ছাড়িয়া দিয়া চিন্তাকুল) সাহেব ! সাহেব ! তবে

নিশ্চয় সে—(টেবিলে খুঁজিতে খুঁজিতে Visiting কার্ড লইয়া)

এইতো, এইতো Card পড়ে রয়েছে—Mr. S. Anderson !

শঙ্করা । হুঁ হুঁ, অণ্ডারসন্ । এই লেখা ছেই খিলা ।

(হ্যা বাবা, এই কাগজ দিয়েছিল, মেম সাহেব তার সঙ্গে চ'লে
গেল ।)

মিঃ সেন্ । মিস্ ডোভী, আচ্ছ তোরাই একদিন কি আমারই একদিন !

এই পিস্তল হয় তোমার বুকে না হয় আমার বুকে ! এত বেইমানি !

রোজ রোজ আর সহ্য হয় না । সঙ্গে আর কে ছিল ?

শঙ্করা । আমার সেই কম্পাউণ্ড বাবু খিলা ।

(আমাদের সেই কম্পাউণ্ড বাবু ।)

মিঃ সেন্ । হুঁ । আজ সব গুপ্ত রহস্য প্রকাশ করব, ডোভীব নাম পৃথিবী থেকে মুছে ফেলব, না হয় আত্মহত্যা করব । এমন তুচ্ছাবিণী স্থালোকও জন্মায় ! How breach of trust ! খালি কান্না বাজী করে বেড়ান ! জোচ্চোর—First class জোচ্চোর ! এই Revolverই তোমার উপযুক্ত শিক্ষা দিবে । [বেগে প্রস্থান]

শঙ্করা । (করপুটে) জুহার প্রভু জগন্নাথ ! মেতে রক্ষা কর, শঙ্করাকু রক্ষা কর । আজ গুটে নহি গুটে খুণ হবার হব । হায় হায়, হয় মু আউ কর করিমি, গাঁকু পড়াইমি । এই রাগ উপবে যদি জানি পারে ইয়ে কম্পাউ মেম সাইবর ভাব লোক অছি, একা সাঙ্গরে মদ খালন্তি তেবে তো তেল বায়গুণ পুনি জলি উঠিব । না বাবা, আউ পুষেইব নাই, শেষেকু জিহল জিমি না কান্নি জিমি । এই ছেকে জীবন নেই পলাই বাবা । ওলো বাপলো, মালো ধইলালো !

(দোহাই ঠাকুর জগন্নাথ ! রক্ষাকর—রক্ষাকর । হায় হায়, আজ একটা না একটা খুন হবেই হবে ! হায় হায়, আমি আর থাকবনা, কটক পাগাব ! এই রাগের উপর যদি আবার জানতে পারে যে ঐ কম্পাউণ্ড বাবুটী মেম সাহেবের পিয়ারের লোক, এক সঙ্গে মদ খায়, তবে তা তেলে বেগুনে জলে উঠবে ! না বাবা আর এখানে থাকি পোষাবেনা । শেষে কি জেলে যাব না কান্নি ঘাব । এবার প্রাণ নিয়ে পলাই বাবা ।) [প্রস্থান ।

পঞ্চম গর্ভাঙ্ক

বিদ্যাপতির বাগান বাড়ী

(সময়—সন্ধ্যা । ইয়ারগণ পরিবেষ্টিত, মদ সোডা ইত্যাদি হারমনিয়াম,
বাঁয়া তবলা ইত্যাদি, ওস্তাদগণ আসীন ; মদ্য পান চলিতেছে,
সিগারেট খাওয়া পান খাওয়া চলিতেছে । কস্তা পেড়ে
কোঁচান ধূতি, জামা, চোখে চশমা হাতে নানা
প্রকার আংটা, চেন ইত্যাদি পোষাকে ভূষিত
হইয়া বিদ্যাপতির প্রবেশ । ইয়ারগণ—
দাড়াইয়া নানা ভঙ্গীতে অভ্যর্থনা
করিতে লাগিল ।)

রতীন । এখনও তো আমাদের খোদ মালিকেরই দেখা নেই !
মানুকে । বড় লোকের বড় কথা, বড় কাজ !
হারু । তাতে আবার নবমৌবন !
সুধা । ততক্ষণ আমাদের একখান গান টান হোক না কেন ?
সকলে । হ্যা হ্যা, তাই হোক !
রতীন । গারে মানুকে গা, তোর কান্তকবির গানটা গা ।

(গীত)

তোরা যা কিছু একটা হ'
Roy, কি Sinha, কি Dass কি Shanne,
কি Dutt, কি Dwarkin, Show.

মাফ করে মাথা whisky চা পানে,
ধুয়ে কালো অঙ্গ glycerine মাঝানে,
ছুটে যা বিলেত, Italy, Japanএ,

(and) inspire your country-men with awe !

শুপ্ত চেষ্ঠায় যদি এইটে মনে হয়,
য়ে বাবার Iron-safe তত brittle নয়,
তবে, submit to your doom, take to
hatchet or loom,

(কিম্বা) ঐ অগতি গতি “Law”.

আর যদিই না থাকে legal acumen,
steal from father's cash box Rs. 10
একটু pulsatilla-nux সম্বলিত box,
(কিনে) কর একটা হ জ ব র ল ।

(বিদ্যাপতির প্রবেশ)

ঈশ্বরগণ । (দাঁড়াইয়া) শ্রীর, আইয়ে !

বিদ্যা । আরে তোমরা বসো, বসো ।

(সকলের উপবেশন এবং মদ্য পান করণ)

রতীন । এবার বিদ্যাপতির বিদ্যার পরিচয় সরকার বাঙালির নিশ্চয়
বুঝতে পারবেন ।

মান্কে । Knight উপাধি এবার বিদ্যাপতির নামে gazetted
হবেই হবে ।

হারু। আর বেশী দেবীও নেই। 1st January তো এল বলে। ভোট ?
মুন্সিপালের ভোটের অভাব কি ? এই ধর, আমরা এতগুলি বন্ধু
বয়েছি, বাগবাজারে গয়লারা আর খুটেওয়ালীরা রয়েছে ! অমনি
নয় বাব, পঞ্চাশ হাজার টাকা দান !

সুধা। তা ছাড়া রামবাগান সোনাগাছীর তো ঘোল আনা ভোটই
আমাদের। তাতেও যদি কম পড়ে, শেষ গঙ্গাযাত্রীদের খাটয়া শুক
টেনে আনব। আর গো হিন্দু নাই—গাঁরা সব অমুসলমান হয়েছে !
বিদ্যা। (মদ্য পান করিতে করিতে) তোমরা মেম্ নাচ বল্ নাচ
আনোনি ?

রতীন। সে হবে যখন তুমি Knight হবে। এখন স্বদেশী আমোদই
হোক—দেশের পরমা দেশেই থাক।

বিদ্যা। তবে একখানা বাংলা গানই হোক।

রতীন। বাঙ্গালার ছেলে আমরা, বাংলা গান হবে না তো কি হিন্দী
হবে ?

মান্কে। হিন্দী গানের কি বুঝব বল ?

হারু। সত্যি তো গানের মানে না বুঝলে আগে স্মৃতি হয় কি ?

সুধা। তবে একখানা মিঠে কড়া বাংলাই হোক। কই গো তোমরা
স্বদেশিনী।

(সকলের মদ্য পান)

বিদ্যা। দিল্লীকা লাডু। (মাতাল অবস্থা) মদ দেওনা বাবা এত
কৃপণতা কেন, মদ দেও stupid ! খেমটাওয়ালী বোলাও, নাচ
আর গাও।

ইয়ারগণ । কুচ পড়োয়া নেতি Sir, সব মজুত হায় হুজুর ।
 রতীন । কইগো, বাগবাজারের নবীনের রসগোল্লা !
 মানকে । কইগো, দ্বারিকের চিনি পাতা দই !
 হারু । কইগো, ভীম নাগের সন্দেশ !
 সুধা । কইগো, বড় বাজারের খাস্তা গজা !

(খেমটা ওয়ালীদের প্রবেশ ও নৃত্য গীত)

কেমন মাসীর বোন্ পো তুমি, দেও দেখি গাঁথিয়ে মালা ।
 দেখো যেন বাগ করেনা, মোদের সেই রাজবালা ।
 চাপা ফুঁই টগর ফুলে গেথে হার বিনাস্তে,
 মনে প্রাণে বেঁধে তারে, জুড়াব প্রাণের জালা ।

(অটল বৈরাগীর প্রবেশ)

অটল । হরেকৃষ্ণ, জয় বাবেশ্যাম !

ইয়ারগণ । আরে এস এস, বাবাজী এস । তোমাবিনা! গোকুল যে
 অঙ্ককার !

অট । হারে রাম রাম ! এবে মাইয়া মানুষ এহানে ! এগ সোয়াশী
 আছেন ত ? তান্‌রা গিরস্ত ভাল জাতি ত ? হা মশায়, তিনিরা.
 কি বলে, বাজারের বিণ্ডা নন ত ?

রতীন । আরে নানা, তুমি ভয় পাচ্ছ কেন, এরা খাস সোণাগাছীর
 সোণাপীর ঠাকুরের সেরা সেবাদাসী ।

অট। আপনারা ত মাইয়া মাচষের কথা কন্ নাই, হরিনাম ঐবে বলছিলেন।

মানকে। নিশ্চয় হরিনাম হবে। তুমি বসে শ্রবণ কর।

অট। সেবা দেই মাঠাকরান। (নমস্কার পূর্ব উপবেশন)

[খেমটাওয়ালীগণের প্রস্থান।

রতীন। গাও, কীর্তন গাও।

মানকে। না হয় গাও টপ্পা গান, নাচ উড়ে নাচ।

হারু। নাগো, চৈতন্যলীলা গাও, ধাঙ্গর নাচন নাচ।

সুধা। না না, মায়ের নাম কর। কি বলহে অটল বৈরাগী? তুমি রামায়ণ শুনবে?

অট। আজ্ঞা, হরিনাম শুনবার লাইগা ত আইছি। একি, স্বয়ং বাবুইয়ে মাতাল হৈয়া পড়ছেন! আপনারা মদখাইছেন নাকি? রাম, বাম, রাধা মাধব!

(নাকে কাপড় দিয়া পলায়ন চেষ্টা)

রতীন। আরে পাগল, মদ নয়,—সুধা—নামায়ত পান! একটু খাবে?

(সকলে অটলকে ধরিয়া বসাইল)

মানকে। অটল, তুমি কাছা দেওনা কেন?

হারু। অটল, তোমার ঝোলায় চাট্ টাট্ এনেছ নাকি? ও বাবা, বিড়্ বিড়্ করে বিষমন্ত্র ঝাড়ছে যে!

সুধা। আরে ছিঃ, তোরা ওকে বিরক্ত করিস্ কেন? গাওগো গাও, হরিনাম গাও তোমারা। কোথা গেলে, এস গো।

(বাউলবেশে খেমটাওয়ালীগণের পুন প্রবেশ ও নৃত্য গীত)

দিল দরিয়ায় ডুবে দেখরে ওরে আমার মন,

(শুধু) ডাকলে কি আর পাবি গুরুর অনেষণ ?

তুমি যথা তথা কর গমন, (শুধু) ভক্তি কর ঐ চরণ

এপারে না হয় ওপারে, হাতে না হয় বাজারে,

জলে স্থলে অনলে অনীলে দিবেন দরশন ।

(ভাবে গদগদ হইয়া অটলকে লইয়া সকলের নৃত্য)

[সেলাম করিতে করিতে খেমটাওয়ালী ও ওস্তাদগণের প্রস্থান ।

রতীন । (হাত ঘড়ি দেখিয়া) রাত বারটা বেজে গেছে ! চল আমরাও

যাই, হাবুকে বাড়ীতে রেখে পরে আমাদের স্থানে আমরাও যাব ।

একটা Taxi দেখতো ?

মান্নকে । এত রাত্তিরে বাগানে কি Taxi পাওয়া যাবে । এই মাতাল

অবস্থায় হাবুকে নিয়ে যাই বা কি করে ?

(রিক্সার ঘণ্টার আওয়াজ)

হারু । ঐ যে রিক্সা যাচ্ছে !

সুধা । তা মন্দ নয় ।

অটল । হরে কৃষ্ণ, জয় রাধেশ্যাম ।

সুধা । তোমারি কামছান অটলদা ! চল, বৈষ্ণবীর বাড়ী যাবে ?

বিদ্যা । চালাও বাইজী কা ঘর । (গান ধরিল, গাচার পাখী গেল উড়ে

থুয়ে দু'ট লম্বা ঠ্যাং) (হারু একথানা রিক্সা আনিল, হাবুকে গাড়িতে

বসাইয়া নিজে বসিল ।)

[সকলেই মাতাল অবস্থায় অটলসহ প্রস্থান করিল ।

বর্ষ গর্ভাক্ষ

উন্টাডিক্সী

(প্রশস্ত নন্দমার মনলা জল প্রবাহিত হইতেছে, রাস্তায়
পাহাড়াওয়াল দণ্ডায়মান, রিক্সা গাড়ী করিয়া মাতাল
অবস্থায় হাবু ও হারুর প্রবেশ)

বিছা। (গান কবিত্তে করিত্তে) “খাঁচার পাখী গেল উড়ে, খুঁয়ে ছুঁট
লক্ষা ম্যাং !”

হারু। আরে শালা, কোথায় নিয়ে এলি ?

বিঃ ওয়াল। ভুজুব, এইত উন্টাডিক্সীর রাস্তা ধরেছি, গ্রামবাজার দূর
আছে ।

বিছা। রাত কত ? বাইজীকে গাইতে বলুন শালা ? “খাঁচার পাখী—”

হারু। বাইজী কোথায় হাবু, এ যে রিক্সাওয়াল।

বিছা। খেমটাওয়ালী ! “খাঁচার পাখী—”

হারু। (রিক্সাওয়ালার পেনি) থামা বাটা থামা। তোকে নাচতে
হবে ।

বিছা। না না গাইতে বল। মদ দেও। “খাঁচার পাখী—”

হারু। চুপকর্ চুপকর্ ঐ দেখছিস্ কে আসছে—পাহাড়াওয়াল !

বিছা। কে ও, প্রাণের বন্ধু ! এস, আমার হৃদয়ে এস, তাপিত প্রাণ
শীতল কর, বড় জ্বালা বড় জ্বালা !

হারু। ওরে বাবা পরলেবে ! (বেগে পলায়ন)

পাহাড়াওয়ানা। (অন্তরালে) কোন্ হায়, খাড়া হো।

(পাহাড়াওয়ানা কর্তৃক বিদ্যাপতি ধৃত)

বিদ্যা। কে বাবা, চৌদ্দপুরুষ, যমপুরী থেকে আসছ ?

পাহা। হা, তোমরা যম হায়। চল্ থানামে। এৎনা রাতমে দারু-

পিকে কাঁহা ঘুমতা হায় ?

বিদ্যা। তোমার চৌদ্দপুরুষ ঘুমেগা, হাম কাহে ঘুমেগা। হামতো কথা

বলতা হায়, শশুর বাড়ী যাতা হায় জানতা হায়, হাম ঘর জামাই
হায় !

পাহা। ক্যা, শশুর বাড়ী যাতা হায় ! চল্ শালা তোমকে শশুর বাড়ী

ভেজেগা।

(বিদ্যাপতিকে টানাটানি করিতে লাগিল)

বিদ্যা। (দাড়াইয়া) তোম্ কোন্ ভেজনেওয়ানা হায় ? হামারা শশুর

বাড়ী হামই জায়েছে।

(দস্তাধস্তি করিতে করিতে বিদ্যাপতি নর্দমায় পড়িয়া গেল)

পাহা। (স্বগত) শালা বড়ি আসামী হায়, ছোড়েছে নেই। (প্রকাশে)

শালা তোম্ উঠগে নেই ?

বিদ্যা। (পকেট হইতে মদের বোতল বাহির করিয়া পান করিতেছে।)

হারে ক্যা নিড়্ বিড়্ করতা হায় ? খোড়া পিওগে ?

পাহা। বাম, রাম ! ভাণ্ডা দেখা হায় ? মারে ডাণ্ডা ভংগে ভুৎ !

বিদ্যা। দাড়া বাবা, খেয়েনি একটু মৌজ করে। আঃ যেন বরফের

পাহাড়ে বসেছি ! একটা তাকিয়া হ'লেই ভাল হ'তো। এও বেয়ারা,

একটো তাকিয়া লিয়াও

পাহা। (বানী বাজাইল)

(অপর পাহাড়াওয়ালার প্রবেশ)

পাহাড়াও, শালাকো থানামে লে চল ।

(উভয়ে টানাটানি করিয়া উঠাইল, নর্দমার জল
পাহাড়াওয়ালাদের গায়ে ছুড়িতে লাগিল ।)

বিছা। আঃ, জ্বালাতন কর কেন বাবা ! ইচ্ছে থাকে, আমার সঙ্গে
বসে যাও । ভোর হ'লে সবাই মিলে আমার শ্বশুর বাড়ী যাব ।
তোমরা ছ'জনে ছ'পাশে থাকবে, আমি তোমাদের কাঁধে চাপব,
চ্যাং চ্যাং, চ্যাডাং চ্যাং করে চলে যাব । আমার শ্বশুর বাড়ী কত
আদরে থাকবে । আমার স্ত্রী সাক্ষাৎ দুর্গা—যেমন রূপ, তেমন গুণ !
সতী লক্ষ্মী আমার কখনও রাগ করে না, বেজার হয় না, যা চাই
তাই দেয়, নিজে খাইয়ে দেয় । সত্যি বলছি, তোমার দিকি,
আমার সঙ্গে চল, দেখতে পাবে ।

[পাহাড়াওয়ালার জোর পূর্বক ধরিয়া টানিয়া

প্রহার করিতে করিতে প্রস্থান ।

সপ্তম গর্ভাঙ্ক

মিস্ ডোভীর শয়ন কক্ষ

(সময়—রাত্রি দ্বিপ্রহর । মিস্ ডোভী Compounder সহ
মদ্য পান ও প্রাণের আবেগে গান করিতেছে । মিঃ সেন্
মাতাল অবস্থায় পিস্তল হাতে ঘরের পশ্চাতেব
জানালা ভাঙ্গিয়া প্রবেশ এবং মিস্
ডোভীর প্রতি পিস্তল লক্ষ্য করিল,
(Compounder উপবিষ্ট)

মিঃ সেন্ । মিস্ ডোভী ! কার সঙ্গে বেড়াতে গিয়েছিলে ? কার সঙ্গে
মদ খাচ্চ ? সত্য বল, নয় তো —

মিস্ ডোভী । (ডরার হইতে পিস্তল বাহির করতঃ মিঃ সেনের প্রতি
লক্ষ্য করিয়া) খবদাঁর মিঃ সেন্ ! আমার যা খুসী তা ক'রেছি—
আমি স্বাধীন । তোমার ইচ্ছা না হয়, ভাল না লাগে, চ'লে যেতে
পার ।

মিঃ সেন্ । বটে, আমি কেউ নই ? তোমার স্বৈচ্ছাচারিতা অনেক দিনই
লক্ষ্য ক'রেছি, ধরতে পারিনি, আজ হাতে হাতে ধরা পড়েছে ।

মিস্ ডোভী । তুমি আমায় শাসন করবার কে ? তুমি কি আমার
স্বৈচ্ছাচারিতার, ব্যাভিচারের সহায়তা কর নাই ? কই, তখন তুমি
আমায় সে কুপথ থেকে বারণ করনি কেন, সংশিক্ষা দেওনি কেন ?

যদি তা পাপ বলে জ্ঞান ছিল, তবে শাসন করনি কেন? তুমিই
আমার পাপের প্রশ্রয়দাতা—দারী তুমি।

মিঃ সেন্। আমি ?

মিস্ ডোভী। হ্যাঁ, তুমি ! তুমিই আমাকে লোভে বশীভূত করেছ।

মিঃ সেন্। তবে বলতে চাও, তোমার চরিত্রে কোন দোষ ছিল না ?

মিস্ ডোভী। না। দোষ থাকতে পারে, কিন্তু তুমি তার সংশোধন করনি,
বরং প্রশ্রয় দিয়েছ।

মিঃ সেন্। ভাল, কোন্ রূপে গুণে এই Compounderএর বশীভূত হ'য়ে
আমায় অবজ্ঞা করছ ? ইয়ারকি করা, মদ খাওয়া কি আর লোক
ছিল না ? একি তোমার যোগ্য বলতে চাও ?

মিস্ ডোভী। সে নুৰ্খ্বার ক্ষমতা তোমার নেই, তুমি পুরুষ।

মিঃ সেন্। হীন, নীচ, কদাকার—বে ভূতের কাজ করে—

মিস্ ডোভী। চুপ্ stupid, বেশী বাড়াবাড়ি ভাল নয় ! রাগের চরম
সীমা অতিক্রম করেছ—জীবন সংশয়—মৃত্যুর জন্ম প্রস্তুত হও ?

মিঃ সেন্। (হাশ্ব) মৃত্যু ! তোমার মত হীন চেতার সঙ্গে কথা বলাও
পাপ ! তোমার মত নীচ প্রবৃত্তিকে আমি ঘৃণা করি।

মিস্ ডোভী ! মিঃ সেন্, সংঘত হয়ে কথা বল। আমি নীচ হীন হতে
পারি—কিন্তু তুমি ভদ্রলোক হয়ে আমার মত হীন কার্যের সহায়তা
করা কি তোমার উচিত ছিল ? আমি তোমার বিবাহিতা স্ত্রী নই ?
তুমি আমার শাসন করবার কে ? আমি নীচগামিনী হ'তে পারি,
কিন্তু তুমি—তুমিই কি উচ্চগামী ? তোমার বিবেক আছে, বুদ্ধিও

আছে, তবে তোমার এ দশা কেন? আজ মাতাল হয়ে আমার
সং শিক্ষা দিতে এসেছ, এতদিন কোথায় ছিলে? ভেবে দেখ দেখি—
তুমি কী আর আমি কী? যদি বিবেক এসে থাকে—সব পড়,
পাপের ছায়া মাড়িও না—মানুষ হও, ভদ্র সন্তান বলে পরিচিত হও।
আমার প্রকৃতির জন্ত আমি দায়ী—তুমি নও।

মিঃ সেন্। (হাত হঠতে পিস্তল পাড়িয়া গেল) মিস্ ডোভী, কাদম্বিনী
দেবী, যদি মানুষ হ'তে পারি তবে আর একদিন দেখা করব, নতুবা
এই শেষ। সব পাওয়া যায়, মান গেলে মান ত আর পাওয়া যায়
না! মানুষের শ্রেষ্ঠ গুণ যা, তা হারিয়েছি—মান হারিয়েছি! মানুষ
হব—ম'নুষই হব!

[বেগে প্রস্থান।]

মিস্ ডোভী। (হাশ্ব) বোকা, বোকা, গাঙ্গা বললেও অভ্যক্তি হয় না!
আরে মানুষের প্রকৃতিকে কি কেউ নিবৃত্তি করতে পারে? চলে
গেল! ভালই হ'ল। আজ খোলা প্রাণে নিভয়ে মদ খাব, প্রাণের
পিপাসা মিটাব। My darling (মদেব দ্বাস দিল)

[মদ পান করিয়া বিছানায় পাড়িয়া গেল।]

ছোকরা। (স্বগত) আজ মিঃ সেন্কে ভাড়াতে, কাল আমার তাড়াবে।
যত শীগ্গির হয় কাজ উদ্ধার করতে হবে। আচ্ছা, মদের সঙ্গে কিছু
মিশিয়ে দিলে হয় না?

(আলমারী হইতে শিশি বাহির করিয়া মদের থানে মনফিয়া
মিশাইয়া মিস্ ডোভীকে খাওয়ারাইল এবং নিজে
মাতালের ভাগ করিতে লাগিল)

**My darling, sweet-heart ! Take a glass more and be
happy.**

মিস্ ডোভী । **All right my beloved.** (মত্তপান ও অচৈতন্য)

ছোকরা . [ইঙ্গিত করতঃ চারি পাঁচ জন সঙ্গী ইয়ার গৃহে প্রবেশ
করিল এবং মিস্ ডোভীর গহনা, টাকা, ক্যাশ
বাক্স ও সিক্কর ভাঙ্গিয়া সমস্ত লইয়া সকলেই
প্রস্থান করিল ।

তৃতীয় অঙ্ক

প্রথম গর্ভাঙ্ক

ধনপতির বহির্বাটীর প্রাঙ্গন

(সময়—সকাল বেলা । গৃহ মধ্যে বিদ্যাপতি রুগ্ন-শয্যায় শায়িত,
হাটুতে হাতে মাথায় ব্যাণ্ডেজ, সাবিত্রী সেবা করিতেছে ।

ঘবেব জানালা খোলা এবং প্রাঙ্গনের সমস্ত .দেখা
যাইতেছে ও শোনা যাইতেছে । বিদ্যাপতি
সময় সময় ঊকি মারিয়া দেখিতেছে ও
উঠিতে চেষ্টা করিতেছে)

(গান করিতে করিতে খেতাজিনীর প্রবেশ)

নঁদুর দাঁনী বাজে বুঝি বিপিনে ।

গ্রামের দাঁনী বাজে বুঝি বিপিনে ।

নহে কেন অঙ্গ অবশ হইল,

সুধা বরষিল শ্রবণে ।

বৃক্ষ ডালে বসি, পাখী অগণিত

জড়বৎ কি কারণে ।

যমুনার জলে বহিছে তরঙ্গ

ভরু হেলে বিনা পবনে ॥

একি একি সখি, একি গো নিরখি,
দেখি সব গোধনে ।

ভুলিয়ে বদন, নাহি খায় তৃণ,
আছে যেন হীন চেতনে ॥

আর এক দিন গ্রামের ঐ দাশী
বেজেছিল কুঞ্জবনে ।

কুল লাজ ভয় হরিল তাহাতে
মরিতেছি গুরু গঞ্জে ॥

সাবিত্রী । (কাঁদিতে কাঁদিতে চোখ মুছিতে মুছিতে বাহিরে আসিয়া)
ভগবান্, কি পাপে আজ আমার এ দুর্গতি হ'ল ! মাগো দুর্গে,
আমার দুর্গতি নাশ কর মা ।

শ্বেতা । (সাবিত্রীকে বৃকে জড়াইয়া) সই, কাঁদলে কি হবে, ভাগ্য ছাড়া
তো পথ নেই । ঈশ্বরের দোষ নেই, তিনি মঙ্গলময়, তাঁ'কে ডাক
শান্তি পাবে । সয়া যাতে ভাল হয়, ভগবানকে জানাও ।

সাবিত্রী । ভাই, আর যে সহ্য করতে পাচ্ছি না ! সই, সব বুঝি, সব
বলতে পারি, সব দেখাতে পারি, কিন্তু মনের আশ্রয় কি ক'রে দেখাব ;
কি ক'রে নিবাব ! (কাঁদা)

শ্বেতা । সই, তুমি এত দুর্বল ! মনের জোর কর, মধুসূদনকে ডাক,
তিনিই শান্তি দিবেন । লেখা পড়া শিখে হিঁড়ব মেয়ে হয়ে এটা
জাননা যে, কায়মনপ্রাণে ভগবানকে ডাকলে তিনি নিশ্চয় রক্ষা
করবেন । সাবিত্রীর কাতর আহ্বানে সত্যবান পুনর্জীবিত হয়েছিল
তা কি জান না ? তুমি যে সেই সাবিত্রী-ই ! সত্যবানকে বাঁচাও ।

সাবিত্রী । ভগবানকে ডাকলে আমার স্বামীর প্রাণ রক্ষা হবে ?

শ্বেতা । নিশ্চয় হবে । তিনি পরম দয়ালু । তুমি এত উতলা হ'ও না,

মনের জোর কর, ভগবানে বিশ্বাস রাখ, আশা পূর্ণ হবে ।

সাবিত্রী । সেই, তোমার কথায় আজ আমার কি আনন্দ হচ্ছে তা মুখে

প্রকাশ করে বলতে পাচ্ছি না । সংসারে এক সেই তুমিই আমার

আপনার জন । মায়ের মৃত্যুর পর থেকে তুমিই আমার মায়ের মত

যত্ন ক'রে শোক তাপ ভুলিয়ে রেখেছ—মায়ের শোক ভুলে গেছি । ৫

বিদ্যা । সাবিত্রী, বড় যত্নগা হচ্ছে, সেইকে নিয়ে এস, একবার দেখব ।

সেই নয়—দেবী, দেবী ! দেবীকে দেখলেই আমি ভাল হব । ভয়

নাই সেই, আমি আর দানব নই, মাতাল নই—মৃত্যু পথের যাত্রী ।

দেবী দর্শনে মুক্তি পাব ।

সাবিত্রী । চল সেই ঘরে চল, একবার দেখবে ।

[শ্বেতাজিনীকে ব্যগ্র সহকায়ে টানিয়া লইয়া গৃহ মধ্যে গমন ।

(শ্রান বদনে ধনপতির প্রবেশ)

ধনপতি । (কপালে করাঘাত করিয়া) ভাগ্য, ভাগ্য, সবই ভাগ্যের ফল !

লোকে কথার বলে—পোষ্য পুত্র ঘর জামাই, ছুঁই ব্যাটাই সমান !

আমার বেয়াইও টাকার লোভেই ছেলেকে ঘর জামাই দিয়েছে ।

হায়রে টাকা, তোর মহিমা তুই-ই বুঝিস্ !

(চোখ মুছিতে মুছিতে সাবিত্রীর পুনপ্রবেশ)

ধনপতি । (বৃকে জড়াইয়া ধরিয়া) আর কাঁদিস না মা, কাঁদিস না ।

কি করব বল, বাপের কি ইচ্ছা নয়, মেয়ে আমার সুখে থাকুক,

মনের মত বর হোক ? মাগো, এখন তো বুঝবি না, বুঝবি পরে, যখন ছ'চারটী মেয়ে হবে আর তা'দের যখন বিয়ে দিবি, তখন এই বাপের কথা মনে পড়বে মা, মনে পড়বে !

সাবিত্রী । বাবা, ও কথা বলবেন না । কখনও কি আপনার নিন্দা করেছি, না আমার স্বামীর নিন্দা করেছি ? আমার অদৃষ্ট, ভাল মন্দ সবই আমার অদৃষ্ট ! আমার অদৃষ্টের জন্তু কি আর একজন দায়ী হ'তে পারে ? কাহারও দোষ নয় বাবা, আমারই কপালের দোষ ।

ধনপতি । মা, ভাবিস না, ভগবানকে ডাক, তিনিই মুখ তুলে চাইবেন । তো'র মত লক্ষ্মী মেয়ে অসুখী হতে পারে না, তুমি আমার অন্নপূর্ণা মা । আমার মন বলছে, আমি তো'র সব শুভ লক্ষণ দেখছি, ভাবিস না মা, ভাবিস না, জামাই ভাল হবে, সেরে উঠবে !

সাবিত্রী । বাবা আপনার আশীর্বাদ কখনও বিফল হবে না—সে বিশ্বাস আমার আছে । আপনার আশীর্বাদে আপনার জামাই সেরে উঠবেন, কিন্ত—

ধনপতি । সে ভাবনা তুই ভাবিস না, জামাই এবার আমার শিব তুল্য হবে ।

সাবিত্রী । (গলবস্ত্র হইয়া ধনপতির পায়ের ধূলা লইল) আপনার আশীর্বাদ কখনও বিফল হবে না । যথার্থই আমি শিব পূজা করেছিলুম ! স্বামী আমার, আমারই থাকবে, আমি তাঁ'কে আমারই মত করে নেব, এ অধিকার আমার, আর কারো নয় । হিন্দু নারী আমি, স্বামী আমারই, আমি তাঁ'রই, এ বিশ্বাস আমার আছে । সতীর একমাত্র পতিই তা'র গতি ।

(মিঃ সেন্ কড়া নাড়িয়া ডাকিল)

মিঃ সেন্ । ধনপতি বাবু বাড়ী আছেন কি ?

ধনপতি । ছাথ তো মা কে ডাক্ছে, দরোজা খুলে দিবে আর । (সাবিত্রীর
তথা করণ)

(বাঙ্গালী স্বদেশী পোষাকে গান্ধী টুপি মাথায় যতীশের প্রবেশ ও
অবাক হইয়া ধনপতির দিকে ও সাবিত্রীর দিকে অবলোকন)

মিঃ সেন্ । মহাশয়, আপনারই নাম ধনপতি বাবু ?

ধনপতি । হ্যাঁ বাবা, আমারই নাম ধনপতি, তবে বাবু টাবু নই । তুমি
কে বাবা ?

মিঃ সেন্ । (ধনপতির পায়ে পড়িয়া নমস্কার করিল) আমার নাম যতীশ
চন্দ্র সেন্, আমার পিতার নাম ৩ বৃন্দাবন চন্দ্র সেন্ ।

[সাবিত্রীর গৃহ মন্যে গমন ।

ধনপতি । বাটে, তুমি আমার বন্ধু পুল্ল যতীশ ! এস বাবা এস. তোমাঘ
খুব ছেলেবেলায় দেখেছিলুম । আহা সেই মুখ, বাপের মুখটী একে-
বারে বসান ! তোমার পিতা মারা যাওয়ার পরে আর তোমার
তেমন কোন খবর পাই নাই । শুনেছিলুম, তুমি বিলেতে গিয়েছ ।
সেখান থেকে তুমি কিছু পাশ টাস্ —

মিঃ সেন্ । আজ্ঞে, এ পাশ আর ও পাশ করে অকাল কুয়াণ্ড হ'য়ে
এসেছি !

ধনপতি । বিদ্যান্ ব্যক্তি নিজে কি আর বলে যে আমি এত বড়, তত
বড় । যা'র টাকা আছে, ধনী, সে কি আর তা প্রকাশ করে বাবা ।
তা বেশ বেশ, বিবাহ করেছ কি বাবা ?

মিঃ সেন্ । (স্বগত) বিবাহ ! হায়, সে কি আর এ জগতে আছে !

আর যদিও থাকে তবে কোন্ লজ্জায় এ মুখ দেখাব ? (প্রকাশ্যে)

আজ্ঞে না, আমার মত অকাল কুস্মাণ্ডের হাতে মেয়ে কে দেবে ?

বরং গলায় কলসী বেঁধে জলে ফেলে দিবে তা'ও ভাল ।

ধনপতি । তোমার পিতার বিষয় সম্পত্তি কি হ'ল বাবা ?

মিঃ সেন্ । আজ্ঞে, সাত্বেব সেজে আর Race খেলে তার সন্ধ্যাবহার
করেছি, এখন পথের ভিখারী ! (স্বগত) হায়রে রেস্ !

(ঔষধের শিশি ও গ্লাস হাতে সাবিত্রীর প্রবেশ)

সাবিত্রী । বাবা, এই mixtureটা এখন দোব কি ?

ধনপতি । মা, বাবাজী এখন কেমন আছে ?

সাবিত্রী । আজ যন্ত্রণা অনেক কম, তবে Bandage এখনো খোলা হয়নি ।

ধনপতি । হ্যাঁ মা, এই ঔষধটাই এখন দেও । একে চিনিস মা ? এষে
যতীশ—আমার বন্ধু বৃন্দাবনের ছেলে, বিলেত থেকে পাশ করে
এসেছে । বৃন্দাবন যে আমাদের কত আপনার ছিল, আর তার
সম্বন্ধে কত দিন কত কথা যে তোকে গল্প করেছি মা ! সে বৃন্দাবন
আজ কোথায়, আর তার ছেলে আজ কত বড় হয়েছে ! আচ্ছা মা,
শ্বেতার সঙ্গে যতীশের বিয়ে দিলে হয় না ?

সাবিত্রী । বেশ তো বাবা, তবে পছন্দ হবে কি ? আমার সই যে কালো !

[গৃহ মধ্যে গমন ।

মিঃ সেন্ । হ্যাঁ কাকাবাবু, অসুখ কা'র, কি হয়েছে ?

ধনপতি । আমার জামাতা বাবাজীর । এই পড়ে গিয়ে জখম হয়েছে

বাবা ! আমার আর তো কেউ নাই, এই মেয়েটাকে বিয়ে দিয়ে
 ধর জামাই রেখেছি । তুমি যখন এসেছ তখন তোমায় এখন কিছু
 দিন ছাড়ব না । জামাইটাকে একটু দেখে শুনে ভাল করে দাও, আমি
 তা'কে তোমাবই হাতে দেব, তুমি তা'কে শিখিয়ে পড়িয়ে নিও ।
 তুমিও অন্তর কেন থাকবে, এই খানেই থাক না । আর শ্বেতাকে
 যদি তোমার পছন্দ হয় তবে তা'কে বিয়েই কর না ? একবার
 দেখবে ? আচ্ছা আমি তা'কে ডেকে পাঠাচ্ছি । সাবিত্রী, একবার
 শ্বেতাকে পাঠিয়ে দেনা মা !

সাবিত্রী । (গৃহ মধ্য হইতে) যাচ্ছে বাবা !

(শ্বেতান্বিনীর পুন প্রবেশ)

ধনপতি । (শ্বেতার হাত ধরিয়া) এই আমার আর একটি মেয়ে । কালো
 হোক বাবা, স্বভাবটা বড় সুন্দর ।

মিঃ সেন্ । (স্বগত) স্বভাব, স্বভাব ! (প্রকাশে) আপনি আমার
 পিতার বন্ধু, অতএব পিতৃতুল্য, আপনার একটি দৃষ্টান্তেই এ লম্পটের
 চোখ কুটেছে । জানবেন, অকালকুস্মাণ্ড আজ মানুষ হয়েছে ।

(বিদ্যাপতি সাবিত্রীর কাঁধে ভর করিয়া লাঠি সাহায্যে প্রবেশ)

বিদ্যা । সাবিত্রী, ধর, আমায় শক্ত করে ধর । আজ আমারও দেহে
 ভীম শক্তির সঞ্চয় হয়েছে সাবিত্রী—তোমার সতীত্ব গুণে, তোমার
 স্বামী সেবার । আমিও আর লম্পট নই, অকালকুস্মাণ্ড নই । চোখ
 কুটেছে সাবিত্রী, চোখ কুটেছে ! আমি সব শুনেছি, সব দেখেছি ।
 যদি ষতীশ বাবুর মত লম্পট মানুষ হয়, আমি কি সাবিত্রী রাণীর

স্বামী হয়েও অকালকুম্ভাণ্ডই থাকব ? (ধনপতির পায়ে পড়িয়া) বাবা, আমায় ক্ষমা করুন, আর আমি অন্টার করব না ।

ধন । (ধরিয়৷ উঠাইয়া) না বাবা, তুমি কি অন্টার কবেছ, কিছুই না ।

আশীর্বাদ করি তুমি ভাল হও । আমার সাবিত্রী সাবিত্রী সমান হোক ।
বিদ্যা । (যতীশের দিকে লক্ষ্য ক'রে) তোমার এ দশা কেন ভাই ?

মিঃ সেন । আর লজ্জা দিও না, সবইতো বুঝতে পাচ্ছ । এখন এসো

ড'ভায়ে এক ঘর বেঁধে, ভগবানের নামে শাপথ ক'রে সংসারের
কর্তব্য সাধন করি । আমরাও দশজনের একজন হই—মানুষ হই ।

বিদ্যা । (বুকে ধরিয়৷) অতীতের ঘটনা বিশ্বতির অন্ধকারে নিষ্কোপ
ক'রে এস ভাই সংসারে মানুষ বলে পরিচয় দিই ।

ধনপতি । (বিদ্যার হাতে সাবিত্রী, শ্বেতাজিনীর হাতে যতীশকে দিয়ে)

আশীর্বাদ করি ভগবান তোমাদের মনোবাঞ্ছা পূর্ণ করুন । তোদের

মেয়ে হ'লে আমিও এক চাল চেলে নোব, তখন দেখবি মা হওয়া

কি মজা । (যতীশের ও বিদ্যাপতির প্রতি) বাবাজী, হিঁদুর চাল

বেচাল করো না, পুরোণোর আদর আছে, নূতন চালে বেজায়

নাকাল হবে । (সকলের প্রতি) গৌরী দান প্রভৃতি প্রাচীন শুভ

বিবাহ ক্রিয়া, সন্তানদের প্রাচীন প্রথমত চাল চলন শিক্ষা, সমাজের

রীতি নীতি রক্ষা ক'রে চলা হিঁদুর একান্ত কর্তব্য । গান্ধারী

অকালে কুম্ভাণ্ডের আকার বিশিষ্ট একটা মাংস পিণ্ড প্রসব করেছিলেন,

তাতে দুর্ঘ্যোধন প্রভৃতির জন্ম হয়েছিল এবং সেই সকল সন্তান হ'তেই

কুরুকুল বিনষ্ট হয় !

বিদ্যা । আপনি অশীর্বাদ করুন এই কুম্ভাণ্ড ছয় যেন মানুষ হয় ।

দ্বিতীয় গর্ভাঙ্ক

ধনপতির প্রাসাদ

(সময়—সকালবেলা, রবিবার, দরোজায় ভিক্ষুকগণ কোলাহল করিতেছে । দরোয়ান সকলকে ভিক্ষা দিতেছে । লাঠি সাহায্যে শান্তি অন্ধ ও কুষ্ঠব্যাধি গ্রন্থা মিস্ ডোভীকে সঙ্গে করিয়া ভিক্ষার্থে বাহির হইয়াছে ।)

শান্তি । ভাই, চলতে তোমার কষ্ট হচ্ছে বোধ হয় ?

মিস্ ডোভী । আমার কষ্টের জন্য তুমি মিছে ভাবছ । আমার এখন মরণ হ'লেই ভাল । কিন্তু তোমার কষ্ট যে আমি আর সহ করতে পারছি না ভাই ? তুমি আমার কে, কেন এত দুঃখ পাচ্ছ আমার জন্য ? আমি তোমার কি করতে পারি ? তুমি না দেখলে হয়তো এতদিন পচে গলে ধুলোর সঙ্গে মিশিয়ে যেতুম, কেউ আমার খোঁজ ও করত না ।

শান্তি । ভাই, মরণ হোক বলেইতো মরণ হয় না । কৰ্মভোগ । কৰ্মভোগ শেষ না হলে মৃত্যু হবে কেন ? কৰ্ম করে যাও, ফলাফল ভগবানের হাতে !

মিস্ ডোভী । (চলিতে চলিতে হঠাৎ পড়িয়া গেল) ভাই শান্তি, আমার মাথাটা যেন ঘুরছে, চোখে অন্ধকার দেখছি ! (পতন)

শান্তি । (ধরিয়া উঠাইয়া বসাইল) বড্ড লেগেছে, নয় ? একটু বিশ্রাম কর, শরীর বড়ই দুর্বল কিনা ।

মিস্ ডোভী । ভাই, কি হল বুঝতে পাচ্ছি না । বড্ড পিপাসা পেয়েছে ।

ব্যথা তেমন কিছু পাইনি । মাথা ঘুরে গিয়ে পড়ে গেলাম ।

শান্তি । তবে আস্তে আস্তে চল ঐ গাড়ীবারান্দাওয়ালা বাড়ীতে যাই ।

সেখানে ভিক্ষা ও পান, তোমার জল খাওয়া ও হবে । আজ আর

কোথা ও যাব না । ঘরে মোটেই চা'ল ছিল না, বিশেষ আজ রবিবার

তাই বেরিয়েছিলাম ।

মিস্ ডোভী । তাই চল ভাই । (উভয়ে পূর্ববৎ গমন এবং শান্তির গীত)

শান্তি । যেখানে যা' সাজে, এ বিশ্বজগতে, কেমন সাজায়ে তুমি রেখেছ ।

কি দিব তুলনা, জগতে মিলে না, সৃষ্টি স্থিতি লয় তুমিই করেছ ।

ক্ষুধিতের অন্ন, পিপাসায় বারি, গ্রীষ্মে শীতলতা, শীতের উষ্ণতা,

বরিষার মেঘে দানি বারি ধারা, শশ্যপূর্ণ ক্ষেত্র তুমিই করেছ ।

অন্ধের দিব্যদৃষ্টি, পঙ্গুর ভ্রমণ, মুকের বাক্যালাপ, বধিরের শ্রবণ,

অশ্রু দিয়েছ তাঁদের নয়নে যেমন, অধরে হাসিটী তেমনি ফুটায়েছ ।

দারাপুত্র দিয়েছ করিতে পালন, সুখ দুঃখ দিয়েছ করিতে বহন,

এ সংসার তোমার, তুমিই সংসার, এ সং তুমিই সাজায়েছ ।

(গান করিতে করিতে উভয়ের দরোজার নিকট আগমন । গান

শুনিয়া বাড়ীর মেয়েরা উভয়কে ধরিয়া বসিল । সাবিত্রী ও

শ্বেতাঙ্গিনী উভয়ের পাশে বসিল । নিচের ঘরে

বসিয়া মিঃ সেন্ খবরের কাগজ পড়িতেছে)

সাবিত্রী । আহা কি সুন্দর গান, কি মিষ্টি গলা ! আর একখানা গাও

বাছা ।

শান্তি । মা, আমার বোনটিকে একটু জল দিবেন, বড্ড তেষ্ঠা পেয়েছে ।

(সাবিত্রী তাড়াতাড়ি উঠিয়া গেল)

শ্বেতা । হ্যা! ভাই, তোমরা ছ'বোন বুঝি ?

শান্তি । বোন ও বটে, এক পথের যাত্রী ও বটে ।

শ্বেতা । আহা, তোমাদেরতো বড় কষ্ট ! তোমাদের কি আর কেউ নেই ?

শান্তি । ভগবান আছেন, আর আপনারা পাঁচজন আছেন । আশীর্বাদ করুন—আপনাদের খেয়েই যেন যেতে পারি ।

(মিষ্টি ও জল পাত্র লইয়া সাবিত্রীর পুনঃ প্রবেশ)

সাবিত্রী । এই নাও বাছা, মিষ্টি খেয়ে জল খাও ।

মিস্ ডোভী । মিষ্টি ! মা, মিষ্টি কথার চেয়ে আর কি মিষ্টি আছে মা ? আপনি আমার মুখে জল ঢেলে দিন, আমি পাত্র ছোঁব না—আমি পতিতা, নীচজাতি ! (কাঁদা)

সাবিত্রী । ছিঃ, ওকথা বলতে নেই । জীব কখনো পতিত বা নীচ হয় না । কারণ ভগবান সর্বজীবে বিরাজিত । জীব পতিত হ'লে ভগবান ও যে পতিত হবেন । ভগবান নিজেই বলেছেন—পাপকে ঘৃণা করো, পাপীকে নয় ।

মিস্ ডোভী । মা, আমার সর্বাস্তে বিষ ছড়ান, দেহ দুর্গন্ধময়, আমার ছায়া মাড়ালে ও মহাপাপ ! মা, আমি যে কী বলতে পাচ্ছি না—রাঙ্কসি, রাঙ্কসি ! (কাঁদা) তবে এ ভরসা আছে, সতীর অঙ্গস্পর্শে আমার মত পাপী ও উদ্ধার হবে ।

সাবিত্রী । কেন বৃথা অনুতাপ কচ্ছ । এই নাও, মিষ্টি খেয়ে জল খাও ।

তুমি অতিথি নারায়ণ । নারায়ণ পূজ করা হিন্দুর প্রধান কর্তব্য ।

তুমি যেই হও, জল খাও ।

মিস্ ডোভী । (জল পানাস্তে) মা ! কি আশীর্বাদ করব. কায়-মনোবাক্যে ভগবানকে জানাচ্ছি—আপনার মনোবাসনা পূর্ণ হোক, চিরসুখী হ'য়ে স্বামী পুত্র নিয়ে যেন কাল কাটাতে পারেন ।

শ্বেতা । তোমার এ অবস্থা কি করে হ'ল ? বলতে কি আপত্তি আছে ?

মিস্ ডোভী । আপত্তি আর কি । পাপের পরিণাম ! এ সংসারে

দু'টী পথ আছে—পাপ পুণ্য, সুখ দুঃখ, কু সু. যে পথে ইচ্ছা যেতে

পারা যায় । স্বর্গ ও নরকের বিচার এখানেই হয় মা !

শ্বেতা । তা জানি, কিন্তু তুমি এমন কি মহাপাপ করেছ ?

মিস্ ডোভী । আমার মত পাপী বোধ হয় ছনিয়েয় আর দু'টী

নেই । কুলিন ব্রাহ্মণ কুলে জন্মেছিলুম, বিবাহ ও ভাল ঘরে

হয়েছিল । তার পর যৌবনের উন্নততায় দিশেহারা হ'য়ে দেবতুল্য

স্বামী ত্যাগ ক'রে এক লম্পটের প্রলোভন ফাঁদে পড়ে নারীর

সর্বস্বধন সতীত্বকে বিদর্জ্জন দিয়েছি ! (কান্না) আর বলব না, আর

শুনবেন না,—এ পাপ কথা স্বপ্নেও আনবেন না ।

সাবিত্রী । মা, অনুতাপই তোমার প্রায়শ্চিত্ত, কর্মের অধীন আমবা,

কর্মছাড়া ত পথ নেই ।

মিস্ ডোভী । কর্ম ! মা, এমন কর্মও মানুষে করে ! (কপালে

করাঘাত)

শ্বেতা । তারপর কি হ'ল বল ?

মিস্ ডোভী । তারপর ! আর কি হ'বে ? কুপথগামিনীর যা হ'য়ে থাকে—যত কিছু হীন কাজ সবই করেছি । পয়সা উপায়ও করেছি যথেষ্ট । কিন্তু পাপের পয়সা মা, পাপের পয়সা ! বিষধর সাপের মত এক লম্পট আমায় দংশন ক'রে পথের ভিখারী ক'রে দিয়েছে ! আমি ? আমি মণিহারা ফণির গায় ঘুরে বেড়াচ্ছি । একটি ভদ্র-লোকের কাছে ছিলুম, তিনি আমার নীচ প্রবৃত্তি দেখে আর আমার গঞ্জনা সহ্য করতে না পেরে, শেষে আমায় ত্যাগ ক'রে চলে গেলেন । যাবাব সময় তিনি এই ব'লে গেলেন—যদি মানুষ হ'তে পারি, এ মুখ দেখাব, নচেৎ নয় ।

শ্বেতা । তুমি আর তাঁর খোঁজ করলে না কেন ?

মিস্ ডোভী । না মা, তিনি আর ফিরবেন না, তাঁর যে বিবেক এসেছিল, ঘৃণা হয়েছিল আমার প্রতি । তাছাড়া, আমি আর কি ক'রে খুঁজব তাঁকে ? সেই লম্পট আমায় অজ্ঞান করে সর্বস্ব চুরি করে নিয়ে পালিয়ে গেল । বাড়ীর লোকেরা আমাকে হাঁসপাতালে পাঠিয়ে দেয় । প্রায় একমাস পর ফিরে এসে দেখি—ঘর শূন্য, কিছুই নাই ! সেই থেকেই আমার শরীর ভেঙ্গে পড়ে । বন্ধু-বান্ধব তখন আর কেউ ছিল না, আর অসময়ে বন্ধু-বান্ধব থাকেও না । রূপ যৌবন এইখানেই আমার শেষ হ'ল ! তখন পোড়া পেট চালাই কি ক'রে ? ঘরে সামান্য যা কিছু ছিল, বেচে কোন রকমে দিনকতক চলেছিল । ঘর ভাড়া বাকী পড়েছে, বাড়ীওয়ালা নোটাশ দিয়ে তুলে দিলে । আশা ছিল—মেয়ে পড়িয়ে বা বি-বৃত্তি করে বাকী কয়টা দিন কাটিয়ে দিব । কিন্তু

মা, বিপদ ত একা আসে না! দু'দিন যেতে না যেতেই মায়ের অনুগ্রহ হ'য়ে চক্ষু দু'টী নষ্ট হয়। ক্রমে কুষ্ঠব্যাদি পর্য্যন্ত দেখা দিলে! ধর্ম্মই সূক্ষ্ম বিচারক। এ পাপ দেহ আর বইতে পাচ্ছি না মা,— যমরাজ এখন আমাকে নিলেই বাঁচি। (ইঁপাইতে লাগিল।)

শ্বেতা। তা হ'লে তোমরা মায়ের পেটের বোনু নও?

মিস্ ডোভী। মা, মায়ের পেটে সবাই হয়, তবে শান্তি আমার শান্তি দেবী! শান্তি না থাকলে আরও যে কত দুর্গতি হতো তা বলতে পারি না। শান্তি আমার সতী লক্ষ্মী, দেবী।

শান্তি। ভাই, পরোপকার মহাব্রত। আমি সেই ব্রত অনুযায়ী তোমায় দেখছি মাত্র, তাও কর্তব্যের অধিক নয়। তুমি যতই পাপী হও, ভগবানকে কায়মনোপ্রাণে দুঃখ জানালে তিনি শান্তি দিবেন—তিনি যে বিপদবারণ মধুসূদন, মঙ্গলময়! অনুতাপ করতে করতে তাপিত প্রাণের প্রার্থিত হ'বে, ভগবানে বিশ্বাস হ'বে, তাঁকে ডাকার মত ডাকতেও পারবে।

সাবিত্রী। বাঃ বাঃ, চমৎকার উপদেশ, ধন্য তোমার ব্রত সাধনা, ধন্য তোমার স্বামী সেবা!

শ্বেতা। তোমাদের দেশ কোথায় ভাই, তোমার স্বামী কি করেন, তুমি ভিক্ষা কর কেন?

শান্তি। ভিক্ষা করি কেন—পেটের জ্বালায়। নৈচে থাকতে ত হ'বে, পোড়া পেটেও কিছু দিতে হ'বে। ভগবান যে ভাবে বাথেন তাতেই সূখী, কারণ তাঁর তো কোন দোষ নেই—দোষ আমার পোড়া কপালের। যদি তা না হ'বে তবে রূপগুণ সম্পন্ন দেবতুল্য স্বামী

পেয়েও তাঁর সেবায় বঞ্চিত হব কেন ? আমি দরিদ্র পিতা মাতার সন্তান । বোধ হয় আমার রূপগুণের দোহাই দিয়েই আমার পিতা-মাতা আমাকে বড় ঘরে কল্যাণদান করেছিলেন । স্বামীর ঘর বোধ হয় পাঁচ সাতদিন মাত্র করেছিলুম । সে আজ প্রায় বার বৎসরের কথা ।

শ্বেতা । তোমার স্বশুরবাড়ী কোথায় ?

শান্তি । মহেশপুর ।

সাবিত্রী । সেখানে তোমার কে কে আছেন ?

শান্তি । মা. সেখানে যদি কেউ থাকবেই তবে এমন করে রাস্তায় বেরুব কেন ? স্বামীর ভিটে-মাটি কামড়ে পড়ে থাকতুম । বাপ মাকে ত আগেই খেয়েছি । আমারও কঠিন ব্যারাম হ'য়ে এই অঙ্গটা পড়ে যায় । বাপের সংসারেও আমার আপনার লোক কেহ ছিল না । দূর সম্পর্কীয়া একজন পিসীমা ছিলেন, তিনিই আমাকে এখানে নিয়ে আসেন ।

শ্বেতা । তোমার অসুখের সময় তোমার স্বামী তোমাকে দেখতে এসেছিলেন ত ?

শান্তি । শুনেছি তিনি এসেছিলেন কিন্তু আমার সঙ্গে দেখা করেন নাই ।

সাবিত্রী । তাঁর খবর তুমি কিছু জান কি ?

শান্তি । তাঁর গৌজ নিতেই আমার পিসীমা আমাকে এখানে এনেছিলেন, কিন্তু কে গৌজ করবে ? পিসীমাও কিছুদিন পরেই মারা গেলেন । তবে আমি বাপের বাড়ীতেই শুনেছিলুম—আমার স্বশুর মারা যাওয়ার পরেই তিনি উচ্ছ্বল হ'য়ে বিষয় সম্পত্তি নষ্ট করে ফেলেন ।

শেষ যা' কিছু ছিল বেচে দিয়ে বিলেতে চলে যান। কিন্তু তিনি এখন কোথায়, কেমন আছেন বা কি কচ্ছেন কিছুই জানি না। তবে এই কথা খুব জোর করে বলতে পারি—তিনি জীবিত। তিনিই আমার চিরসার্থী।

সাবিত্রী। সতী লক্ষ্মী তুমি, আহা ভগবান তাই করুন, তোমার স্বামী জীবিত থাকুন, তোমায় গ্রহণ করুন।

শ্বেতা। তোমার স্বামীকে দেখলে এখন তুমি চিনতে পারবে ?

শান্তি। স্বামী! নিশ্চয় চিনতে পারব। স্বামীকে চিনব না? তবে এ চোখ দু'ট ভগবান দিয়েছেন কি করতে? যুগযুগান্তর চলে গেলেও কেউ কখন স্বামীর মুখ ভুলতে পারে? স্বামী স্ত্রী এক অঙ্গ, এক ধর্ম, এক আত্মা, এই হ'ল আমাদের হিন্দুর সতী নারীর কথা। চন্দ্র সূর্যের যেমন রশ্মির সঙ্গে সম্বন্ধ কেউ কারো ছাড়া নয়, আমাদের স্বামী স্ত্রীরও সেই সম্বন্ধ—এই আমাদের বিবাহ বন্ধনের মন্ত্রশক্তির প্রভাব।

মিস্ ডোভী। ভাই শান্তি, মহাপাপিনী আমি—আমার দশা কি হবে, আমার প্রায়শ্চিত্ত কিসে হ'বে? সতী অঙ্গস্পর্শে মহাপাপী ও উদ্ধার হয়। তোমরা সবাই মিলে আমার মাথায় ও সর্বাঙ্গে তোমাদের পানের ধূলা মাখিয়ে দেও, আমি পাপমুক্ত হ'য়ে শান্তি ধামে যাই। দেও ভাই দেও, সবাই মিলে দয়া করে আমায় মুক্তি দেও। আর যে যন্ত্রণা সহ করতে পাচ্ছি না। (কাপা ও হাঁপান)

সাবিত্রী। ভাই, বৃথা শোক করোনা, ভগবানকে ডাক, তিনিই মুক্তি দিবেন।

শ্বেতা । আহা, কি অনুতাপ ! ভাই, অনুপ্রাণিত হ'রে একবার ভক্তিতরে
ভগবানকে ডাকলেই তিনি শাস্তি দিবেন—তিনি যে পতিতপাবন ।
পতিতকে উদ্ধার করেন বলেইতো তিনি পতিতপাবন ।

(সকলে মিলিয়া ডোভীকে গুশ্রবা করিতে লাগিল ও
পাথার বাতাস করিতে লাগিল)

গীত

শাস্তি । যদি শরণ নিতে পারি রাজ্য পায় ।
নাম নিলে তাঁর হৃদয় ভরে কলঙ্ক কোথায় পলায় ॥
নাম কলঙ্ক ভঞ্জন, ডাকলে নিরঞ্জন, থাকে কি অঞ্জন,
লাঞ্ছনা গঞ্জন কি রয়, ভেসে যায় তাঁর করুণায় ॥
যে করুণা যাচে, আসেন তাঁর কাছে
অভয় চরণ তার তরে আছে ;
ডাক পতিত, পতিতপাবন, তরবে নামের মহিমায় ॥

মিস্ ডোভী । হাঁ হাঁ—তিনি পতিতপাবন—কিন্তু আমি যে বড়ই পতিতা !
ভাই শাস্তি, তোমার মুখে হরিনাম তোমার মুখে সতীর সতীত্ব কাহিনী
শুনতে আমার বড়ই আনন্দ হয় । মনে হয়, আমি আর এ রাজ্যে
নেই—কোন অজানা অচেনা দেশে চলে গেছি !

শ্বেতা । স্বামীর জন্ম তোমার বড়ই দুঃখ হচ্ছে মনে হয় ?

শাস্তি । স্ত্রীজাতির স্বামী ভিন্ন যেন অন্য গতি নাই । আমার প্রাণের
ব্যথা, দুঃখের বোঝা, কেউ অনুভব করতে পারবে না—যে কখনও
স্বামী হারায় নাই ।

সাবিত্রী । তোমাদের জাতকুটুম্ব, জাতি, বা সামাজ্যের কেউ সাহায্য করলে না ?

শান্তি । সাহায্য ! জাতকুটুম্ব ! জাতি, সমাজ ! সমাজে যদি মানুষ থাকত, আর তাঁদের যদি চোখ থাকতো, তবে দেশের বিশেষ হিন্দু-নারীর এ দুর্বস্থা গবে কেন মা ? তার উপর আমার এ অবস্থায় কে সাহায্য করবে, কে এই ভাব বোঝা বইবে মা ?

শ্বেতা । সত্যই সমাজ অন্ধ ! আচ্ছা, তোমার স্বামীর নাম মনে আছে ?
শান্তি । নাম ! স্বামীর নাম । তা আবার মনে থাকবে না ? এইতো হ'ল আমাদের জপের মালা—ইষ্টমন্ । আমার হৃদয়ের একমাত্র আবাধ্য দেবতার নাম—শ্রীযুক্ত যশোবন্ত চন্দ্র সেন্ ।

মিস্ ডোভী । (চমকিত হইয়া) ভগবান, আমার বক্ষা কর ! (চলিয়া পড়ল এবং সাবিত্রী কোলে বসিয়া বসিল । শ্বেতা বাতাস করিতে লাগিল)

শান্তি । একি ভাই, আমার স্বামীর নাম শুনে তুমি এমন হ'বে গেলে কেন ?

সাবিত্রী । বোধ হয়, এ স্বামীর নাম ও এই ছিল ।

শ্বেতা । স্বামীর নাম ! যশোবন্ত সেন্ কে ? মহেশপুর কোথায় ?

(মিঃ সেন্ খববেব কাগজ হস্তে প্রবেশ)

মিঃ সেন্ । একি, তোমরা এখানে কি সব গোলমাল কচ্ছ ? (স্বগত)

একি । এ কা'বা ? (প্রকাশ্যে) যাও, তোমরা সব বাড়ীর ভিতর যাও , দরওয়ান, এদের ভিক্ষা দায়ে দেও ।

শান্তি । (স্বগত) সেইরূপ, সেই স্বর ! ভগবান, যদি দুঃখিনীর প্রতি
দয়া হ'য়ে থাকে তবে একবার পরিচয় ক'রে দেও প্রভু ।

মিস্ ডোভী । জল, জল—একটু জল ?

শ্বেতা । আমিই এনে দিচ্ছি । (গৃহ মধ্যে গমন করিল এবং পুনরায়
জল লইয়া প্রবেশ করিল)

মিঃ সেন্ । এ স্ত্রীলোকটির অসুখ বুঝি ?

সাবিত্রী । অসুখ তো আছেই, তাতে গরিব দুঃখী—ভিখারি !

মিঃ সেন্ । এরা কোথায় থাকে, এর—এর—এব নাম কি ?

শান্তি । (স্বগত) ভিখারীর আবার ঘববাড়ী, ভিখারীর আবার নাম !
(প্রকাশ্যে) আমার ভগ্নীর নাম—কাদম্বিনী দেবী ।

মিঃ সেন্ । কাদম্বিনী ? Miss Dowvi ! হায় অভাগিনী, শেষে
তোমার এই দশা হ'ল !

(শ্বেতাঙ্গিনী কর্তৃক মিস্ ডোভীর মুখে জল প্রদান)

মিস্ ডোভী । আঃ কি শান্তি, কি সুখ ! তুমিই দত্ত শান্তি, তোমার
ব্রত সাধনা ও সার্থক । যতীশ তোমার স্বামী । স্বামী সুখে তুমি
চির সুখী হও । (মৃত্যু)

মিঃ সেন্ । এ কি শান্তি ! (বাহু বেঁটন পূর্বক ধারণ)

শান্তি । সার্থক আমার সীতের সিন্দূর, সার্থক আমার হাতের নোয়া !

ধ্বনিকা

গ্রন্থকারের অন্যান্য পুস্তক ।

সতীরমন্দির	...	১\	(সামাজিক নাটক)	
স্ত্রীর অধিকার (২য় সং)		১\	উপন্যাস	
গুরুদক্ষিণা		১০	উপন্যাস	
সায়েস্তা খাঁ বা বঙ্গে মগ	...		ঐতিহাসিক নাটক	} (যন্ত্রস্থ)
গুরু (চণ্ডাল রাজ)	...		পৌরাণিক নাটক	
পরব্রহ্ম	...		আধ্যাত্মিক নাটক	
সুগল মিলন (হোলী)	...		পৌরাণিক নাটক	

প্রাপ্তিস্থান—গুরুদাস লাইব্রেরী ।

২০৩।১ ১ নং কর্ণওয়ালিস স্ট্রীট, কলিকাতা ।

